




BIBL. 3æ PROB.
S. J. X

S. J.



JOHN CARTER BROWN
LIBRARY

Purchased from the
Trust Fund of
Lathrop Colgate Harper
LITT. D.

Voy I / 312

Coll. complète

L. A. P.

De Backer, t. II,

p. 68 - n° 4.

Le P. Schrobach, mission-
naire aux Philippines
et aux Mariannes.

V I T A

^{ET} O B I T U S ^{C. III. 88}

VENERABILIS PATRIS

AUGUSTINI
STROBACH

è SOCIETATE JESU,

EX

Provincia Bohemiæ

pro Insulis Marianis electi

MISSIONARII;

Et à

Rebellibus Sanctæ Fidei in iisdem

Insulis barbarè trucidati

ANNO 1684. MENSE AUGUSTO.

CONSCRIPTA

à

P. EMMANUELE

DeBOYE, è Societate JESU,

Collegii Societ. Anno M. DC. XCI. J. W. v. n. ab. brugi

CUM LICENTIA ORDINARI.

OLOMUCII, Typis Joannis Josephi Kylian,

REVERENDISSIMO

AC

ILLUSTRISSIMO

DOMINO DOMINO

JOANNI
JOSEPHO

S. R. Imp. COMITI

BREÜNER,

Nobili DOMINO in Statz,

LIB. BARONI in Stubing,

EPISCOPO

NICOPOLITANO,

Cathedralis Ecclesiæ Olomucensis

DECANO,

&

PRIMO PRÆLATO,

Celsissimi ac Reverendissimi PRINCIPIS

EPISCOPI OLOMUCENSIS


Suffraganeo, in Spiritualibus Vicario

Generali & Officiali, nec non ad

S. ANNAM

RECTORI PERPETUO, &c. &c.

DOMINO DOMINO.



REVERENDISSIME

AC

ILLUSTRISIME

PRÆSUL

DOMINE DOMINE



*Unus est Vene-
rabilis hic Vir,
qui utramque no-
bis paginam fecit.*

*Nos vitam & obitum damus:
Tu lucem utrique. Redit ad*

ma-

manus , à quibus accepit ut tantus esset. Quem dum anno salutis 1674. die 25. Februarii per impositionem manuum Sacrarum ad Sacerdotalem dignitatem evocares , sic eum Sacrificio Incruento aptâsti , ut simul designares cruentam Victimam , decennio pòst , anno nimirum 1684. Mense Augusto , in Marianis Insulis , pro fide sancta immolandam. Quamvis enim à primo vitæ melioris diluculo in hanc spem se erexerit : illam tamen à Tuis manibus , Sacerdotali charactere confirmatam , se accepisse , nobis ex Hispania scripsit , dum ex portu Gaditano in Orbem

Orbem alterum hac ipsa vota
illum à nobis transferrent. Sors
nimirum tam beata in Tuis ma-
nibus erat, quam die illa, quâ
S. Mathias annumeratus est
Apostolis, ex Sacro calice, velut
ex urna extraxisti. Tunc enim
adhuc à Sacro Oleo calens, in
hanc flammam exarsit, ut in cor-
de suo diceret: Quis mihi hoc
tribuat, ut Sacrificio huic In-
cruento, suo etiam tempore
alicubi in Indiis succedat cru-
entum. & me ipsum hostiam
adjungam in holocaustum
Altissimo! Ratum habuit hoc
votum Altissimus, & per ma-
nus Tuas ascendit in odorem sua-
vitatis.

vitatis. Tu Oleum affudisti,
quod in tantum Divini amoris
exarsit incendium, & ad fon-
tem jam refluit, in oram vesti-
menti Tui. Est prima ex Pro-
vincia nostra in Insulis Maria-
nis hostia, quam manus Tua al-
tari imposuit; primitiæ debentur
Sacerdoti Magno, cum quo vi-
ctimas penè omnes partiri voluit
Magnus DEUS. Simul filius
est: quia, uti rectè asserit Divus
Julianus, (a) Patres nostri sunt
Episcopi: per ipsos enim ve-
ram nativitatem suscepimus;
dum per manuum impositionem
illum nobis spiritum infundunt,
quo regenerantur omnes animæ

(a) apud Surium tomo I.

in

in vitam aeternam. Patere igitur, ut ad Patrem redeat Porphyrogenitus Benedictionis Tuae filius. Neque est quod addamus nos qui jam quæ de manu Tua accepimus, dedimus Tibi. (a) Addat Benedictionum Dominus, quam nos non possumus, benedictionem pro benedictione. Cum quo voto sim laboris mei, Benedictionis Tuae partum, in manus Sacras quàm reverentissimè consigno.

(a) I. Paralip. c. 29.

REVERENDISSIMO ac
ILLUSTRISSIMO NOMINI
TUO

*devotissimus & humillimus
in Christo servus*

Emmanuel de Boye S. I.

JOANNES WALT

Societatis JESU per Boëmiam Præ-
positus Provincialis.

Cùm librum, cui titulus: *Vita & Obitus Venerabilis Patris Augustini Strobach è Societate JESU*, à Patre Emmanuele de Boye, nostræ Societatis Sacerdote conscriptum, tres ejusdem Societatis Sacerdotes recognoverint, ac in lucem edi posse judicaverint: potestate à Patre nostro Thyrso Gonzalez, Præposito Generali, ad id mihi datâ, facultatem concedo, ut liber typis mandetur. In quorum fidem has literas manu mea subscriptas, & sigillo Officii mei munitas dedi. Novædomi 18. Aprilis, Anno 1691.

L. S.

JOANNES WALT



VITA ET OBITUS
VENERABILIS
P. AUGUSTINI
STROBACH

Societ. JESU.

CAPUT I.

*Natales Venerab. P. Augustini & primæ
ætatis Studia.*



IR ex paucis nobilis, &
non minimæ authorita-
tis, cùm intellexisset, in
delectu Sociorum ex
Regno Bohemiæ pro
Marianis Insulis Venerab. Patrem
AUGUSTINUM STROBACH, in primo
quidem Scrutinio præteritum, mox
tamen velut alterum pro Rodericio

A

Xave-

Xaverium, alteri Sacerdoti jam præelecto subrogatum fuisse, in hanc memorabilem vocem, animi sui congratulationem explicuit, dicens: DEI digitum direxisse hanc sortem, valitum enim quàm bellissimè pro Infulis illis Barbaris, ad agnitionem veri Numinis, & S. Evangelii obedientiam perducendis, virum illum, qui ipsa in fronte ac vultu signum rei sacræ, ceu characterem virtutis præferret, futurum proinde vel solum illius aspectum, Barbaris illis gentibus pro magno Sanctæ Fidei argumento. Et verò hanc sui æstimationem omnibus impressit, qui vel à prima innocentia illum noverant, vel deinceps per vitam in Religione actam eo familiaritariùs usi sunt: sic, ut ex eventu licuerit concludere, altissimam DEI Sapientiam velut ab utero pretiosam hanc animam designasse in vas electionis, ad portandum, & annunciandum Nomen suum gentibus, quando nimirum à primo statim rationis diluculo totum illius affectum

fectum ad studium vitæ sanctioris, & summi ac incommutabilis Boni amplexum convertit, eâ in sancto proposito constantiâ, ut à fervore, quem puer conceperat, remisit nunquam, sed per incrementum ætatis insigniter auxerit, profectum in exercitiis pietatis strenuè perurgendo, nullo alio Doctore & Magistro, quàm illo, qui spirat ubi vult, & quantum vult. Hæc Justorum est semita, per quam currunt inoffenso pede, dum se totos Spiritui regendos permittunt, usque in perfectum diem.

Quoniam verò à prima educatione spes maximæ pendent, hac primâ illum gratiâ dignata fuit DE I miseratio, ut progenitores nancisceretur optimos. Avitæ enim & Catholicæ semper Religionis erant, atque inter suos morum honestate, ac vitæ integritate singulariter spectabiles.

Iglavia, Urbs ex primis in Marchionatu Moraviæ, Virorum Præclarissimorum Patria, nascentem excepit.


Pater erat Joannes, Margaretha Mater, par lectissimum conjugum; ut, qui fructum ferè omnem sancti Matrimonii, in unius DEI obsequium, ex consensu mutuo, æmulâ tamen pietate, gratanter consecrârunt. Tres enim proles masculas, Societati JESU transcripserunt, inter quos *Augustinus* nascendi ordine medius fuit. Natu major, hodie dum superstes *Joannes*, natu minimus *Tobias*, dum eadem charismata æmulatur, ex primo Theologiæ anno præripitur, cum singulari apud posteros commendatione vitæ religiosissimè transactæ.

AUGUSTINO insuper ex fonte baptismatis nomen *Ignatii* adhæsit, quòd Sancti hujus patrocinio adjutam se meminisset Mater, ut Filium hunc, in salutem gentium destinatum, sinè magnis doloribus, felici partu, eniteretur. Pro tertio parvulus ipse in Sacramento Confirmationis *Aloysii* nomen assumpsit, quòd jam tunc in animo suo constituisset, mores suos innocentissimos

mos ad hanc normam penitus exigere; ad quod inducebatur propensione illa, ad eadem pietatis exercitia, quibus Angelicum hunc juvenem infantiam, & primæ ætatis studia consecrâsse audierat. Tum verò maturuit in virum, in Xaverium Indiarum Apostolum totum obtutum mentis convertit, cujus etiam abiens in Indias nomen assumpsit, vocatus deinceps *Carolus Xavier*, ut illum non minus moribus exprimeret, quàm credebatur, ex vultu, ex oculis, & lineamentis reliquis corporis, utcunque ad vivum referre. Injustam enim staturam excreverat, supra mediocritatem proceram, capillo nigro, & copioso, fronte amplâ, diductâ magis quàm altâ, oculis verecundis, genis pallentibus, toto denique corporis habitu ad decentiam efformato.

Mater optima, quam post se reliquit superstitẽ, ut primùm intellexit beatissimum ejus obitum, non in lacrymas, sed, quas Divinæ Bonitati debebat,

reverentes gratias effusa, *Fateor*, agebat, tanto me munere indignam: sed quando ita Cælo placuit me consolari, DEO sit omnis gloria, qui tali me filio beavit, qui ejus, quam à teneris unguiculis cum lacte imbibit, pietatis nunquam satur, nunquam pertæsus, nunquam ab ea, per omnem vitam mihi cognitam, recessit. Ut enim Triviales ludos frequentare cœpit, domi in secretiore camera, aram sibi erexit, ad quam & Sacerdotum Sacrificia imitabatur, & preces innocentes affectu majore, quàm ætas ferret, assiduus & de genibus persolvebat. Neque dubium hisce tam tenellæ pietatis fomentis exarsisse in illa deinceps incendia, de quibus in valedictoriis ad Matrem scribens fatebatur, gaudia se suam jam sinu continere non posse, quòd ad illas missiones Optimi Numinis favore admissus sit, ad quas adhuc puer tanto desiderii ardore ferebatur.



C A P U T II.

Primæ literæ, & studia mansuetiora.

E Doctus jam & dignoscere, & clamor imitari primos latinitatis characteres, quia indolem prodebat maximis parem, & propensionem animi ad omnes meliores artes, translatus fuit ad Gymnasium Societatis *Augustinus Ignatius*, multiplici fœnore, quo accumulabat gaudia domûs totius, imprimis Matris. Hæc enim vigili oculo observans pietatis cum ætate paria semper incrementa, gaudebat & dolebat, velut Monica pro Augustino, ex causa tamen dispare. Lætabatur ex felicibus progressibus filii, dolebat ex affectu Matris. Nec enim aliarum lacrymarum filius fuit, quàm superabundantis consolationis, quâ diffusebat cor piæ Matris, dum in eo admiraretur jam in illa ætate solitudinis propositum, & protracta in oratione


soliloquia. Totum enim, quod à pensis Scholasticis supererat tempus, in recessu ad oratorium suum transigebat, observatus à Matre frequentius in ardentissima suspiria incaluisse. Quâ solitudine se tuebatur adversus juventutis lubricæ pericula. Nulli enim Sodalium adjungebatur, sive illum ad fallendum tantisper lusu tempus invitarent, sive ad otiosas extra urbem excursiones protrahere conarentur, sive ad liberiores auras evocarent. Negotium illi erat, quo spiritum excolebat, jam ex libello, jam ex memoria orationum pensa persolvens; sæpius inventus in silentio, sinè voce, Divina meditari, decussatis ante pectus brachiis. Ex qua cum DEO consuetudine illam referebat morum gravitatem, quæ quia ætatem excedebat, passim & familiari joco; tum à domesticis, tum ab æqualibus indigitabatur, *mirabilis puer*. Matri verò, quæ initia & progressum, actiones demum ejus omnes in corde suo conferebat, gau-

gaudium erat, & risus consolationis
dulcissimæ, non tamen sinè dolore;
quis enim in Matre reprehendat, com-
moveri viscera super filiolum, quem
advertebat in tenellum, & innocen-
tissimum corpus adeò severè animad-
vertere, ut quoties mutaret supellesti-
lem lineam, notas inveniret copiosi
sanguinis, ex flagellis, & ciliciis corpo-
ri impressis. Noctu enim surgebat de
lectulo, & secretiora domûs loca quæ-
rebat, sub tecto, & aliis in latebris, ut
quò securiùs, eò inclementiùs in se
sæviret. Tunc verò velut gladio per-
cussit cor Matris, cùm ex pallore vul-
tûs suspicata quod erat, deprehendit
appressum corpori cilicium jam inte-
riora carnis penetrâsse. Hæc omnia
à suo Aloysio didicerat, cujus absti-
nentiâ ut pariter imitaretur, jejuna-
bat frequentiùs, protractâ etiam in
dies integros inediâ, in tantam, ut fa-
tetur bona Mater, virium debilitatem,
ut vires pro ambulando non suffice-
rent. Illud prorsus insolens visum,
in

in quo tamen proposito Matris pietatem ejus constantia vicit, quando toto jejunii majoris, sive Quadragesimæ tempore, nihil omnino calidi admittere voluit, in cibum ordinarium. Cùm autem sacra hebdomada Dominicæ Passionis advenisset, statuerat, totum id tempus penitus sinè potu, sinè cibo impastus transigere, nisi ad Matris querelas, conscientiæ & Scholæ Præsides, mandatis severissimis se interposuissent, docuissentque, DEO longè gratius daturum sacrificium, si rigorem inediæ, in meritum obedientiæ commutaverit, duplicis meriti victima, ex oblatione voluntatis propriæ in obsequentiam voluntatis alienæ. Paruit tunc ille, ut erat ad nutum Præsidium suorum cereus, quia tamen in sui ipsius vincendi studio ingeniosus est amor, facilè adinvenit novum seipsum vexandi argumentum, priore fortè molestius, quando per Sacrum illud Triduum sibi severissimum silentium indixit, ut neminem allo-

alloqueretur, nulli verbum interpellatus reponeret. Quas tunc sustinuit à coætaneis vexas & irrisiones? à domesticis etiam reprehensiones? est qui testatur, neque verberibus adigi potuisse, ut vel dolore exprimente, verbum redderet: verè *puer mirabilis*. Cui & illud adscribo, huc spectans: proposuerat in animo, nihil unquam ulli hominum negare, quod à se peteretur, in honorem sancti Tutelariorum sui *Ignatii*; Intellexerant hoc collatanei, qui plus nimio Sancto hoc ejus proposito abusi, quoties vel ob negligentias Scholasticas, vel alia similis culpæ merita damnabantur ad poenam, putà verrendi Scholam, recurrebant illi audacter ad *Augustinum Ignatium* orantes per *S. Ignatium*, poenam ut hanc in se fusciperet, & innocens pro nocentibus persolveret; quod ille, doli non ignarus, arridente vultu faciebat, sic ut tandem adversum fuerit, majori anni parte servum vernaculum Scholæ egisse. *Puer verè mirabilis*. Et hæc
Rudi-

Rudimenta erant, quibus ab interno Magistro exercebatur pro Nobiliore palæstra.



C A P U T III.

Altiora studia, & admissio ad Societatem JESU.

DUm ità in omni gratia proficit, abundantius etiam Divino lumine illustrabatur, ità ut jam penitus agnosceret, vocari se à DEO ad JESU Societatem. *Quam vocationem (sic de se scribit) primùm bene concepì in suprema Classe Grammaticæ, fovi per omnia studia humaniora, per trienniū Philosophiæ, usque in alterum Theologiæ speculativæ annum: Nunquam dubitans, hanc mentem à DEO esse. Deliberationem tamen adhibui, quantam per incrementa ætatis potui, adhibitis etiam in consilium Conscientiæ meæ directoribus; semper enim constantem habui, cui omnia Conscientiæ meæ arcana perspecta essent. Tempus deliberationis*

nis elegi in sacro quotidiano post consecrationem ; festis autem & Dominicis diebus, sacrae Communionis.

Movebat autem me ex primis, ut Societatem JESU eligerem, Amor DEI & proximi. DE I quidem, quod hoc Religiosæ vitæ institutum adverterem in propagandā majorem DEI Gloriam ex fine suo dirigi, & omnia in hac Societate fieri purè ac unicè ex studio promovendi obsequii Divini : Proximi verò, quod omnia Ministeria hujus Religionis indissolubili nexu salutem etiam alienam spectarent, erudiendo parvulos in Catechismis, plebem & populum pro Concionibus, omnes bonas disciplinas tradendo in Scholis, penetrando etiam in ultimas mundi partes cum profusione sanguinis & vitæ, ad quod semper ardentissima in me sensi desideria. Deinde videbar mihi in nullo alio statu meliùs aut convenientiùs talenta, quæ à DEO acceperam, in ejusdem usum ac honorem convertere posse. Ac tandem Nomen ipsum sanctissimum me invitabat vehementiùs, quod sperarem sub vexillo hujus Nominis faciliùs pertingere posse ad imitationem

Ducis

Ducis mei JESU, in Societate illorum, quorum mihi præscripta vivendi Regula ad amussim exhibebat vitam JESU, cum etiam populari voce Religiosus Societatis, JESU vita audiat. Petii igitur admitti à Poësi per omnes deinceps annos, & semper spes dilata afflixit animam. Altissimo DEI confilio, ut protracta desideria in illud incendium excrescerent, cui tandem unus Orbis non suffecit.

Dum ità nititur contra obstacula, statuit pedem fortiùs figere in spem contra spem; & studia humaniora, quæ cum insigni eruditione persolve-
rat Iglaviæ, commutare cum severioribus Olomucii, ubi sedes est Episcopalis, & Universale Studium. Ibi admissus ad Nobilissimum Convictorum Collegium, illis adscriptus est, qui Ecclesiasticæ militiæ inauthorantur, ut sic & Altari viveret vicinior, & à seculo remotior. Palæstram jam nactus virtuti parem, amplissimas dedit habenas fervori, in utroque studio pietatis & sapientiæ. Et quidem pro inge-
nii

nii amplitudine cum dignitate pertrahabat Scholastica, cum incitamento verò sodalium, & laudabili æmulatione exercitia virtutum. Sed qui omnium perstringebat oculos, decor erat & splendor quidam thesauri, quem recondebat in corde, à congenita quasi modestia percussus, quæ toto se vultu prodebat. Erat enim animò pacatissimò, fronte semper serenâ, in verbis mansuetus, in omni actione ad decentiam compositus, nulli molestus, sed ad quævis charitatis officia promptus; in se unum rigidus, in quo solo egeret moderatore. Quærebat industriè occasiones contentûs proprii, quantum admittebat statûs Clericalis ratio, & si quid (ut in juventute & multitudine natum est fieri) patientiam etiam contingeret, cum hilaritate excipiebat. Officia viliora, in primis servilia, præripiebat aliis, & quidquid demum ad suâ confusionem faciebat. Dum aliis pro consuetudine in Triclinio accumbentibus prælegeret

ret Thomam Kempensem de imitatione Christi, stando id fiebat, sed ut ille risui se proponeret, genibus flexis lectionem auspicatus est, non finè juventutis, quæ ignorabat, quo animo id faceret, liberali applausu. Consvetas preces, quidquid obmurmurarent Collegæ, tanquam contra exoticos in devotione excessus, non alio situ, quàm de genibus in nuda humo & manibus ante pectus, vel in Crucem collectis, vel in Coelum erectis, oculis verò à terra immotis persolvebat, in nullam partem declinantibus, quamvis ad hoc repentino sæpe strepitu provocaretur. Quem ritum in orando per omnem deinceps vitam retinuit, prout uno velut ore testantur, qui extra & intrà Societatem illi convixerunt, Discipuli imprimis; quos sive ad sacrum, sive alterius exercitii pij causâ ad Ecclesiam duceret, flectebat inter illos, in duro & nudo marmore, sinè reclinatorio, sinè subsidio ad arcendum frigus à manibus in aspera hyeme, atque
itâ

ità exemplo Professoris in imitationem reverentiæ DEO debitæ svavissimè attrahebantur cerei animi Discipulorum, dum forma gregis sui factus, omnia persvaderet; prout testis mihi est Sacerdos boni nominis, sed secularis, *Venerabilis Patris Augustini*, quo nomine hodie dum gloriatur, carus ex paucis Discipulus. In secretis verò corporis afflictationibus jam Theologus quantum sibi licere censuit, tantum ausus, brevi tempore, quam externa specie diximus retulisse *Xaverii* imaginem, macie & pallore vultûs ad plenam symmetriam absolvit.

Has dotes secum ad Societatis Ti-
rocinium attulit Brunam in Moravia,
susceptus & admissus 14. Octobr. Anno
à partu Virgineo 1667. *Pro quo beneficio*
(scribit ille) *quotidie ter DEO supplices*
gratias refero, & singulis diebus corporis
castigationem offero, & omni possibili mo-
do DEO gratus vivere, & Societate me di-
gnum præstare conor.

CAPUT IV.

*Tirocinium, & primæ Vitæ Religiosæ
Occupationes.*

IN Tirocinio nihil minùs quàm Tiro-
nem egit , qui ante ingressum tam
solida posuerat vitæ Religiosæ funda-
menta. Ivit enim tanquam Vetera-
nus per omnia contemptùs proprii ex-
perimenta, in quibus omnibus genui-
num se probavit *S. P. IGNATII* fi-
lium, sic ut exacto primo Novitiatùs
anno Superiores illum censuerint
Scholis, & primæ juventutis eruditio-
ni, applicandum. Primùm igitur
Znoymam ad docenda Rudimenta
missus, simul Tironis, simul Magistri
munus ea satisfactione contempera-
vit, ut utriusque partes bellissimè ege-
rit, suo æquè ac Discipulorum pro-
fectui intentus. Nam & Fratrum
Coadjutorum ministeria agebat, & la-
bores vilissimos hilari vultu præripie-
bat aliis; toto enim tempore, quo
Znoy-

Znoymæ vixit, directorem egit horologii domestici. Somni erat brevissimè, vix ullius cibi homo, vini usu propè sibi interdixerat, & ut hoc propositum ratum haberent Superiores, Medicis conabatur perfvadere, abstinentiam hanc complexionì & valetudini suæ maximè congruere. Paupertatis erat tenacissimus, vilissima in domo ambiebat, & pro zona, quâ vestis adstringitur, recisam ex panno oram adhibebat.

Quæ autem singulariter in illo eminebat, fuit illa, jam in puero laudata, animi ac vultûs modestia, ortum habens ex pudore prorsus Virgineo, custodiâ suâ Angelicâ, indole suavissimâ, pace & serenitate animi perpetuâ, quasi nullum rebellium passionum motum experiri eum contingeret. Persolutô jam Tirocinii bienniô, ad vota Religiosa admissus, munus docendi quadriennio est profecutus, quo simul tempore in Coetibus Marianis juventuti præpositus, pro suo in sanctissimam


DEI Matrem tenerrimo affectu, eundem quibus poterat industriis instillare tenellis animis adlaborabat: quot fab-
 batis facunda dissertatione celebrabat
 virtutes, & laudes Virginis, aptissimis-
 que in argumentum exemplis addu-
 ctis, singulares Maternæ pietatis in
 Clientulos suos favores repræsentaba-
 bat. Festa ejusdem exornabat erudi-
 tis inscriptionibus, symbolis, & pu-
 blicis affixionibus. Habebat in hunc
 usum Marianarum gratiarum Ephe-
 merides, ex quibus lectissima quæque
 in singulas Virginis solennitates devo-
 tionum semper novarum argumenta
 promebat. Et quia exempli vis ma-
 xima, nihil suadebat suis, quod exem-
 plo suo non docuisset. Nam & Ora-
 torium Congregationis, cui præerat,
 suis ipse manibus à sordibus expurga-
 bat, & ad pietatis officia velut Pastor
 gregem deducebat, & quâ animi præ-
 sentiâ cum DEO in oratione agendum
 esset, decentissimâ Corporis compo-
 sitione, in medio Discipulorum fle-
 ctens

ctens edocebat. Et verò in cereos parvulorum animos nullum adhiberi potuit argumentum efficacius. Cujus rei testes habeo quàm plurimos, qui sub Magisterio *Magistri Augustini* ad eruditionem singularem in literis, & splendorem in virtute sunt eluctati. Sic de se fatetur ex pluribus unus: *Annis duobus, quibus sub Ven. Patre Augustino tanquam Professore indignus vixi Discipulus, in illo vivum virtutum solidissimarum speculum, cum vehementi mei ipsius ad imitationem excitamento suspexi.* Vir enim erat DEUM spirans, qui Discipulorum profectum in virtute in primis miris industriis promovebat; nec enim alia cum illis, quàm in DEO & Spiritu fundata colloquia instituebat, captatâ quâvis occasione, velut apud argumentosa, inspergebat salutis documenta. Non facilè seorsim loquebatur ulli, neque loco minùs patente, neque fallendi temporis gratiâ, neque cum alienis Discipulis, suis intentus; quibus singularem virginitatis amorem, tanquam

thesauri pretiosissimi , instillabat , sic ut palàm constaret, pupillam oculi laxisse in *M. Augustino*, si quem fama deterior de neglectu sancti hujus propositi infimulâsset.

Revocatus postliminio à docendi munere, ut intermissum Theologiæ studium compleret, quadrienalẽ Cursum pari ingenii & virtutis comendatione Olomucii absolvit; jamque Sacerdotii dignitate auctus, ad Rhetoricam profitendam, tum Egræ, tum Hradistii progressus, laboribus Scholasticis, qui totum hominem requirunt, conjunxit munus Operarii in vicinis Missionibus, in utroque, & pro Rostris, & pro sacris pulpitis, partes omnes Oratoris ambidextri agens, sic ut neque Discipulis in tradendis præceptis Rhetoricæ, neque Rurali popello in explanandis fidei ac salutis dogmatis operam suam deesse pateretur; ad quem pro exigentia promptè semper, vigil ac pernox advolabat. Cùm autem mentio inciderit Hradistiensis Gymnasii,

fii, lubet adscribere juratum testimonium, quod ejus pro tempore Rector, Vir in regimine Societatis veteranus, his ipsis verbis concepit: *Ven: P. Augustinus Strobach Anno 1677. docuit sub me Hradiffii Rhetoricam. Juratus testor, me nec unicum defectum advertisse, cujus ille id temporis reus fuisset. Virum illum pro sancto suspexi, præsertim dum ad aras operaretur, quo tempore nescio quæ sanctitas ex illo relucebat. Operabatur enim ardentissimè, ac modestissimè, ad singularem spectantium edificationem.*



C A P U T V.

Electio ad Missiones Apostolicas.

Sacerdotio inauguratus Olomucii, Seò jam curas omnes convertit, ut se ipsum DEO Eucharistico adjiceret, hostiam sanctam, beneplacentem, & perfectam. Duplici ad hoc usus præfidio, conjunctione cum DEO intimâ, & irremisso seipsum vincendi, & affli-

gendi studio. Pro utroq; Scholam nactus ex more institutóq; Societatis convenientissimam, Telczii in tertia probatione, ad quam, post absoluta studia omnia, Societatis operarii, antequam in vineam Domini & messem animarum colligendam emittantur, velut in uterum Matris revocantur, ad concipiendum illum fervorem spiritûs, quo confirmati, tanquam virtute ex alto, securi de salute propria, si media illa non negligant, in alienâ procurandam, per omnem latè Orbem amandantur.

Hoc loco positus *Ven: P. Augustinus*, statuit ex fide deinceps vivere, & omnia operari in spiritu ac veritate. Horæ, quas habebat cum DEO, pretiosissimæ illi erant. Et cùm esset ad devotionem quasi à natura factus formatúsque, cum singulari decore peragebat sacra ministeria omnia, & singula; sed super omnia, divinissimum sacrificium, ut videretur DEUM sub speciebus Eucharisticis latentem velut oculis intueri, semper inter calientissima

ma suspiria, sæpe sæpius copiosas lacrymas, quibus inter sacrificandum præ teneritudine animi difflebat. Et quamvis prolixior esset, nemini tamen audientium ingenerabat tædium. Et fuit de sæculi hujus Viris, qui diceret, nullum se sacrum, ad quod *Ven: P. Augustinus* dicendum exiret, neglecturum, quamvis devotioni suæ jam satisfecisset. Quo pietatis magnetismo in illam suâ æstimationem, & venerationem attraxerat Populum, ut eum præ reliquis ambirent in animæ & conscientie negotiis arbitrum. Quam enim in animo suo conceperat Divinæ Majestatis reverentiam, modis efficacissimis imprimebat illis, quibuscum agebat. In quo affectu, ut in horas proficeret, instantissimè implorabat suffragia *S. FRANCISCI XAVERII*, fassus confidenter, nihil ab hoc sancto se unquam petiisse, quod decemdiali ejus honori dicatâ devotione non impetraverit.

Jam verò, ut in suâ etiam odio, &
vin-

vincendi studio Magisterium attingeret, viam inivit duplicem; alteram per confusionem suâ; alteram per macerationem corporis. De utroque, qui spiritum ejus regebant, & experimenta profectûs sumebant, id unum testantur, continuam quæsiuisse sui ipsius & deprimendi, & divexandi occasionem. Et cum vitam ageret prorsus irreprehensibilem, studiosè tamen in nævos suos inquirebat; si que vel similitudinem culpæ deprehendisset ad suâ vilipensionem (& irrisionem etiam si posset) evulgabat, ut quem animo conceperat propriæ vilitatis horrorem, opere contestaretur. Sic dum crederet verbo minùs consideratè à se prolato Contubernalem offendi potuisse, ut primùm in ambulacro domûs occurrentem habuit, ad pedes illius abjectus, & piô osculô veneratus, demississimè rogabat, sibi clementer culpam ignosceret, quam alter ignorabat penitus. Per mensem integrum, jam Sacerdos, Coco adjunctus, omnia
Lixa-

Lixarum obsequia impigre præstitit; nam & vasa immunda mundabat, & pavementum verrebat, & rejectamenta suis manibus collecta efferebat.


Corpus autem divexabat inclementissimè verberationibus etiam publicis ad horrorem spectantium, longè tamen immitiùs privatim, flagris, virgis, Cingulis ferreis, & cilicinis. Per menses propè duos in sinistro genu dolo-rem peracutum passus ex tumore; à consveta inter orandum genuflexione non remisit. Passus subinde amico, à cura corporis multùm semper se abhorruisse, & ex hac causa nunquam extra tempora Religiosæ refectio- nis quantumvis siti urgeretur, admis- sisse haustum, etiam aquæ frigidæ. In hunc modum animam hanc pretiosam DEI altissima sapientia per continuas de se ipso victorias præparabat in illam gratiam, ut tandem *Testis* fieret *Sanguinis* pro ejus gloria, & sanctæ Fidei Confessione profusi. Superiores enim, qui vias Domini attendebant, quas nemo intel-

intelligit, nisi qui currit, favebant illi liberaliter in sui ipsius odio, sive obtineret, quod peteret, sive etiam pro audacia indiscreti fervoris referret reprehensionem, & subinde cum geminata victoria. Ut, cum exorabat copiam sibi fieri naturalis jejunii per diem solarem, quod obtinebat, sic tamen, ut nihilominus commune cum reliquis triclinium accederet, atque ita se gereret, ut rediret impastus, à nemine tamen assidentium notaretur, cibo abstinuisse. Dum in hoc sancto odio tam bene meretur, placuit tandem Infinitæ Bonitati coronare merita, manifestando illi secretum Confilium, quo ipsum elegerat ad annuncian- dum Evangelium suum Gentibus.

Decurrebat *Venerab. P. Augustinus* S. P. N. IGNATII, quæ vocamus *Eucharistica, Exercitia* in integrum mensem protracta. Ultimus dies erat S. FRANCISCO XAVERIO sacer. Toto illo sacri recessus tempore intentus, in quam partem vocaret Spiritus, adver-

advertit singulari DEI erga electos providentiâ accidisse, ut eodem tempore legerentur encyclicæ Adm. R. P.N. piæ memoriæ Joânis Pauli Oliva, quibus invitabantur Missionarii pro Mexico, Philippinis, & Marianis Insulis. Neque jam dubitans DEI hanc vocem esse, multiplicare vigilias, corporis & animi sui immolationes, si ullo aliàs tempore, frequentissimas offerre. Petebantur autem Sacerdotes, & ex solis ditionibus Hæreditariis Augustissimæ Domûs Austriacæ. Jámque in proximo erat, ut delectus fierent. Tunc ille moræ jam, & suû impatiens, ad pedes illius, quem in spiritu habebat Directorem, velut aqua effusus, per Divini Nominis honorem, labores patientis Domini, sanctorum merita, tot animarum salutem, obsecrare, & obtestari: sibi consilio, & auxilio adesse vellet ut in hanc sortem, in quam à puero agebatur, admitti posset, cum jam nihil obstaret, nisi fortè, uti ipse aiebat, propria vilitas; sed in quam ineffabilis

effabilis bonitas & infinita gratia conferre posset, quæ defunt omnia; cùm ab Orbe condito maxima quæque opera per instrumenta vilissima egisset maximus in minimis DEUS.



C A P U T VI.

Adlectus Missionariis Indicis, abit ex Bohemia in Hispaniam.

NON poterant Superioribus non probari hæc animi sensa, neque opus erat experimento ampliùs. Ut tamen sancto fervori novum accresceret pretium, placuit DEO desideria hæc sancta suspendere tantisper, per eventus contrarios. Nam cùm ad delectum Missionariorum pro Indiis ventum fuit, unicus extra censum illum mansit *Ven: P. Augustinus*. Et dum illi expediuntur ad missiones Transmarinas, illi velut ad sarcinas relicto pro Missionis assignatur aula apud Toparcham Teschnensem. Tulit hunc suû neglectum,

ctum, quo reliqua, vultu hilari, & immutato. Et jam ibat, quo Superiorum nutu agebatur, sed in suo proposito, nunquam vacillans. Iter erat Telcziô Pragam, quo Missionarii Indici curru sequebantur. *P. Augustinus* in Spiritu Eliæ pedes præcucurrit; & omnino citiùs illis Moderatori Provinciæ se stitit, nullâ tamen adhuc spe eis se in comitem adjungendi, usque dum conscripti Patres adessent jam ad unum omnes, inter quos vir erat, qui ætatem Sacerdotii propè egerat in valle S. JOACHIMI ad fines Bohemiæ, veteranus ac magni jam meriti Missionarius, cujus tamen vultum ærumnæ durissimæ missionis ità extenuaverant, ut Præpositus Provinciæ (cui incumbabat submittere in tam longinquas oras delectum non solum à virtute, sed æquè à robore corporis probatum) primo ejus aspectu conterritus, de subrogando magis idoneo susceperet consilium. Sors autem regebatur à DEO, & tandem cecidit super *Ven:*

P. Augu-

P. Augustinum, qui velut jam manu Coelum apprehendisset, tanto exultavit gaudio, ut in referendis DEO, & Superioribus gratiis modum non inveniret.

Ut primùm fama vulgavit primitias Bohemæ Societatis animarum quærendarum causâ, abire in mundum alterum, non pauci de prima Nobilitate concurrerunt tum ad officia congratulationis, tum ut hoc ultimum oculis suis solatium carperent, ex aspectu Virorum, quos postera dies ex Orbe patrio in oppositum translatura erat.

Sacerdotes erant sex, Coadjutor temporalis unus. *P. Mathias Cuculinus*, qui cursum Philosophicum docendo absolverat, *P. Joannes Tilpe*, magni jam nominis in missionibus Silesiæ, *P. Paulus Klein* singularem talentorum, *Ven: P. Augustinus Strobach*; hi quatuor dividendi erant per Insulas Philippinas, & Marianas; *P. Josephus Neuman*, quem Mexicum, *P. Wenceslaus*

ceslaus Christman, quem Paraqvaria
præripuerat. Hos deinde infecutus
est Simon Boruhradsky, & ipse spe-
ctatæ Virtutis Religiosus. Quibus
Excellentissimus Regni Burggravius
& primus pro Rege Locumtenens
Bernardus Comes à Martinitz pro suo
in propagationem fidei zelo, ut se bo-
ni meriti participem faceret, non pau-
ca, tum itineri tanto, tum in illicium
convertendorum Barbarorum usui
futura liberaliter offerebat. *Ven: P. Au-
gustino* alio viatico opus non erat,
quàm quod ardor indeficiens patiendi
pro DEO adversa quælibet suggere-
bat. Sinè quo viatico neque per Ger-
maniam invenisset transitum. Sic
enim de se ipso scribebat Tridento 28.
Aprilis, Anno 1678.

*Carò me constitit iter istud, vesperi nam-
que membris omnibus confractus, totòque
corpore eum in modum debilitatus fui, velut
si in equuleo attractus, & tortus fuissèm,
aut insigniter fustigatus, vixque mihi possi-
bile videbatur die insequente iter proseguì ;*
C *sed*

sed major fuit DEI miseratio, apud quem nihil impossibile. Nam sub auroram restitutum me sensi, non quidem in integrum, ad illas tamen vires, ut non obstante dolore, iter profequi licuerit. Videtur optimus DEUS paulatim equuleis sustinendis me aptare velle. Delatus Mediolanum diem ibi substitit, & quid exiguo hoc tempore Mediolani Augustinus? Sacrosanctum illi (sic enim 7. Maij scribebat) relictis curiositatibus aliis, quam primum Sacram Divi Ambrosii adire. Quod autem in summo mihi desiderio fuit, ut viderem, hortus ille erat, in quo S. Augustinus vocem de Cælo lapsam audire meruit: Tolle, lege. Est in eo loco etiamnum Sacellum Conversionis S. Augustini, & juxta alterum, in quo idem Sanctus cum Deodato filio, & Alipio familiari suo, Sacro baptismi fonte ablatus est, & Hymnus Ambrosio - Augustinianus decantatus. Maxime id mihi consolationi fuit, quod ad eandem mihi aram litare concessum fuerit, speroque, quod ubi Divus Augustinus Dominum confiteri exorsus est,

*Et mihi , Nomine hoc licèt indignissimo ,
flammulæ aliquot ad confitendum Nomen
Domini coram Gentibus Augustinianæ ac-
cesserint. Hæ erant pretiosæ occupa-
tiones , quibus fallebat itineris incom-
moda , quæ quanta tulerit , hîc non
refero , cùm communia fuerint fociis
per totum Mediterranei tractum Ge-
nuâ Gades usque , quò in navi Vene-
ta solvit , gravissimè jactatus ex nausea
stomachi , & æstu maris , quo tamen
tempore , adeò exactè observabat or-
dinem disciplinæ Religiosæ , & exer-
citorum spiritualium , non secùs , ac si
in ordinatissimo degeret Collegio.
Prout de illo testatum fecerunt itineris
Socii.*



C A P U T VII.

Ingressus in portum Gaditanum.

FErebatur aurâ prorsus propitiâ , &
afflante à puppi , cum lectissimis So-
ciis , jámque oculis tenebat portum

Gaditanum, cùm simul vidit spes suas ex oculis abripi, casu sanè acerbo. Sed plura hujus generis experimenta dabimus, quibus Summæ Bonitati placuit *Virum desideriorum* per eventus votis contrarios, velut errores quosdam, viâ tamen certissimâ deducere in portum voluntatis suæ. Casum hunc referam verbis ipsis quibus ad nos dedit, in Bohemiam scribens 20. Julij.

Fuit hic dies ex omnibus, quos hætenus in mari habuimus, felicissimus, si ventum spectes, confectis in eo amplius 70. levcis Italicis; infelicissimus autem, si illius eventum. Ad ipsum namque solis occasum, imò in ipso sole occiduo transire vidimus naves 50. aliquot, pulchro cæteroquin, sed nobis lamentabili spectaculo, non vanè augurantibus, ipsissimas has esse naves, sive Classẽ Hispanicam, Mexicum petentem, quæ nos transportare debuit.

Quis satis explicet, qui & quàm varii extiterint in omnibus ac singulis animorum motus: dum oculis nostris intueri cogebamur Socios ad idem ministerium nobiscum deputatos

tatos, remis velisque ad illud contendere, nobis quasi ad sarcinas damnatis. Quid juvabat aspectus navium illuc tendentium, quò vota nostra prævolârunt, si non concedebatur quoque illarum usus? nunquid dimitti hæ una cum adjunctis nostris Coapostolis & Sociis poterant sinè dolore; quas ex amore possidere, quibûsque cum amore perfrui exoptabamus unice? Jam verò quæ ipsam quietem tenuerint mentis imagines, & somnia, cogitare facilius est quàm scribere. Sic ille.

Cùm igitur jam spes nulla effet transmittendi oceanum ante novæ Classis instaurationem, manendum fuit in Hispania ultra annum. Gadibus igitur translatis Hispalim, vulgò Seviliam, animum applicant ad illa studia, quæ excolendis Barbaris maximopere profutura intellexerunt, singuli ferè pro genio. Alii enim Astronomiæ, alii Medicinæ, Mechanicis alii artibus, ut omnibus omnia fierent, operam ad-dixêre. De se autem scribens subjungebat: *Et quid Augustinus? totus est in*

C 3
soli-

soliloquiis. Hæc enim præcipua ejus erat occupatio; quàmvis nec in aliis sibi, suisque intentionibus deesset; idiomati inprimis Hispanico ediscendo pene totum se tradidit, Theologiæ præterea illi, quæ praxim regendarum Conscientiarum præscribit, tum historiæ Gentium, ad quas ibat: in quo imitatus Sanctum Apostolum *XAVERRIUM* scribebat in Provinciam frequentissimè, quæ de Indiis illis ex relationibus aliorum acceperat, sic, ut Epistolæ illius ad familiares justum volumen efficiant: id quod eo consilio faciebat, ut in fratribus suis excitaret affectum, provocaret animos ad easdem Missiones. Et verò meritis illius debemus, quòd non paucos post se subsequenter annis pertraxerit in *novam Hispaniam, Regnum Chilense, & Maragnonem*, & hoc ipso anno, quo scribimus, novas suppetias pro ipsis Insulis Marianis. Singulariter autem manum suam addixerat Procuratori Indiarum in conscribendis Instrumentis publicis rerum primi momenti.

C A P U T V I I I .

*Ultima Professio, & animi præparatio
ad transitum in Indias.*

Cùm jam adesset præfinitum tem-
pus pro Professione ultima 4. Vo-
torum, per errorem neglectus fuit
Ven: P. Augustinus. Noluit tamen sva-
visima DEI Providentia hunc servi
sui neglectum transire sinè augmento
majoris etiam æstimationis, quam illi
conciliavit per testimonium publicum
optimæ memoriæ Generalis Noster
Pater Joannes Paulus Oliva, qui mo-
nitus de errore, literis gravissimis in
Hispaniam datis mandavit, ut, quod
neglectum erat, compensaretur in
proximo ab acceptis literis die festo,
aut Dominico, quo, *sinè exemplo ad po-
steros, propter Patris Augustini virtutem,
sibi uti fatebatur, admodum perspectam,
Vota Professorum emittere posset.* Hanc in
subjecta materia primam abs se dispensatio-
nem concedi, itaque mereri virtutem & ta-

lenta Patris Augustini. Et erant hæc merita jam omnibus nota, & in tanto apud Hispanos foris æquè, ac domi pretio, ut ob eximiam Viri sanctimoniam passim illum dignarentur compellatione *Viri Sancti*; & Generalis Indiarum Procurator, Tirones, qui ex Hispania in Philippinas comitaturi erant, *Ven: Patri Augustino* instruendos, formandósque tradiderit.

Ipse verò ex hac Professionis suæ dilatione novum invenit *Mirabilis* (pro- ut ipse in literis suis meminit) *Providentiæ* & dispositionis erga se Divinæ argumentum. Factum enim fuit, ut vota ultima offerret, (illud inprimis, quo se offerebat ad Missiones arduas finè vitæ subsidiis adeundas) ipso festo S. Mathiæ Apostoli, quo primam novellus Sacerdos (Olomucii in Sacerdotem consecratus à Reverendissimo & Illustrissimo Domino, Domino JOANNE JOSEPHO S. R. I. Comite BREÜNER, Celsissimi Principis CAROLI, Episcopi Olomucensis

Suffra-

Suffraganeo, & Vicario in Spiritualibus, Anno 1674. 24. Febr.) DEO hostiam obtulerat, *ut me ipsum etiam (sunt verba ipsiusmet) hostiam in holocaustum adjungerem Altissimo. Quod quidem utrumque cum incruentum solum sacrificium sit, ut suo etiam tempore cruentum succedat alicubi in Indiis, id unum adhuc superest; & alludens ad nomen Augustini, in quo litera U ter exprimitur, subjecit: sic me DEUS unus & Trinus amet, ut Trinum hoc sacrificium sit perfectum, quod AVGVSTINVS in Trina suo & Uno videtur velle innuere. Neque; lusus in literis, fefellit in factis; quandoquidem cum Mathia subrogatus Josepho, Viro illi emerito, pro quo ad Missiones Apostolicas in provincia adlectus fuit, primus etiam ex Sociis Bohemis in Marianis Insulis cruenta DEO hostia cecidit.*

Ab eo tempore, quo votis ultimis DEO fuit adstrictus, nova illi accrevit religio, ut nè quidem oculum accommodaret spectaculo & ludis, ad quos
sub-

subinde invitabatur ; de quibus in Bohemiam ad Socios scribens , nec quidem mentionem facere sustinuit : *aliis , ajebat , hæc committo . Mihi enim tunc temporis non ludicra , sed maximi momenti , quia salutis , perfectionisque propriae , ac æternitatis incumbabant negotia , agendumque mihi fuit , ac decertandum cum bestiis ferocioribus , indomitis nempe passionibus meis , quas ô si tandem semel debellâssem , ac penitus edomuissem !* Neque solum profanas vitabat mentis distractiones , sed neque sacris , quæ solitudini minùs faverent , se credebat ; sic rationem dans transactæ Quadragesimæ , *tempus , ajebat , hoc egi in meris soliloquiis . Consolabar me Christi per triginta annos silentio , quo tamen non minùs meruit , quàm prædicatione triennali , & quemadmodum dicit alicubi Nierembergii : convenit aliquando nihil agere , ut possit quis postea operari grandia .* Et verò in prædicatione ætatem & annos Christi complevit per omnia illi configuratus , usque ad calicem passionis . Hucusq;
frag-

fragmenta solum dedi Epistolarum,
ex quibus magnæ illius animæ incen-
dia, & pretiosas occupationes, velut
per rimulam inspicere licuit; nunc
dabo Epistolam, ex qua æquum judi-
cium formari possit de XAVERIANIS
illius æstibus: quam ille *Seviliâ* sive *Hi-
spali* dedit Europæ valedicens, 4. Junij
1680. ad fratrem suum juniorem To-
biam Societatis JESU Religiosum,
quem sicut suo exemplo ad vexillum
Christi, Societatem Jesu, pertraxerat,
itâ & vehementer optabat, etiam post
se trahere ad prædicandum iisdem
Barbaris Christi Evangelium. Erat
enim adolescens magnæ spei, & cor-
pore robusto, sed quia cœlo jam ma-
turus, consummatus fuit in brevi,
felici morte vitam meliorem
anticipans.



C A P U T IX.

Epistola Ven: Patris Augustini valedictoria Europæ.

Charissime in Christo Frater. Gratia D.N. JESU Christi & Charitas DEI, & communicatio S. Spiritûs sit cum omnibus nobis, Amen.

Primas de terra, cognitioneque nostra exiens Charitati Vestræ scripsi literas, ultimas scribo, dum tempus propè adesse jam video, ut transeam ex hoc mundo. Benedictus DEUS! qui secundum misericordiam suam magnam, regeneravit nos in spem vivam per resurrectionem JESU Christi: Sicut enim nobis hæc Resurrectio Phase fuit duobus abhinc annis, id est, transitus è terra & cognitione nostra, ita jam nobis iterum Phase est, id est transitus ex hoc mundo. Benedictus DEUS! quia fecit redemptionem plebis suæ, cujus incolatus multum prolongatus fuit hætenus in Hispania, expectando semper beatam illam spem, & adventum diei illius, quo dirumpantur tandem aliquando hæc
vin-

vincula nostra, ut soluti ac liberi transeamus ex hoc mundo ad fortunatam illam patriam, Insulas intelligo Marianas & Philippinas. Videmus enim verò jam, quod tantopere concupivimus, quod tanto speravimus tempore, jam tenemus, & posidemus etiamnum, quod tamdiu desideravimus. Quapropter gaudete unà nobiscum Fratres Charissimi! sed & unà quæso obsecrate, sine intermissione memoriam nostrî facite, in orationibus vestris, si quo modo tandem aliquando prosperum iter habeamus in voluntate DEI veniendi ad designatum nobis desideratissimum Mexicanum & Philippinensem portum & terminum.

Ego verò quoniam ejusmodi roboris ac virtutis expers, in ea loca proficiscor, ubi vel maxime cælesti indigeam ope; nam licet omnem Ecclesiam, quæ in toto est orbe terrarum, cunctis oporteat florere virtutibus, eos tamen præcipuè inter cæteros decet meritis virtutum excellere, qui in Apostolicæ petreæ arce fundati, & inter istos quàm plurimum, qui inter infideles populos & gentes Barbaras: Te ego (liceat uti verbis ipsius-

*ipsiusmet Magni Indiarum Apostoli, meiq;
 antesignani D. FRANCISCI XAVERII)*
 Te ego per DEUM, ejusque cultum oro atq;
 obtestor, ut in tuis precibus & obsecrationi-
 bus meî nominatim ipse recorderis, meque
 insuper Patrum, ac Fratrum Nostrorum
 precibus muniendum sedulò cures; sic enim
 mihi persvadeo, tuâ ac Societatis depreca-
 tione, multis magnisque periculis me Divi-
 nitus eripiendum, adfuturumque indubiè
 tam piis Charitatis Vestræ omniumque No-
 strorum votis DEUM, sanguinéque jam
 olim suo rigatum Marianum Philippinumq;
 agrum, in sæcundam aliquando horreo suo
 inferendam messem excitaturum, neque
 passurum, ut tam calentia Nostrorum vo-
 ta, & desideria irritò conatu elabantur.

*Hac spe freti pergemus nos alacriter,
 nullis omnino parcendo laboribus, sudori
 nulli, non sanguini, non vitæ, id unicè
 semper mente versando ac animo, labores
 omnes, sudorem vitam & sanguinem, me-
 rum esse Marianorum Christianorum &
 Philippinensium semen, quod centupli brevì
 sæeneratione in sæcundas excitabit spicas*

Magnus

Magnus ille agrorum suorū rigator, & Cultor Christus. Item, fortiter agendo solummodo res crescere, & à sola generosa manu triumphos sperari posse, cælo inferendos. Pergemus inquam, alacriter, eoque progrediemur alacrius, Majorumque vestigiis insistemus fortius, bene interim de Divina infideles & gentes barbaras munificentia, atque explicata sperantes dextera, quanto amplius nos, ac Missionem nostram suis apud DEUM precibus ac Sacrificiis commendatam habuerit Societas, quam demissis in terram genibus, ad omnium pedes humillimè prostratus, iterum iterumque suppliciter cupio commendatam.

Charissime Frater, hæc sunt ultima mea in hoc mundo verba. Faxit DEUS, si est ad majorem nominis sui gloriam, majus Religionis Catholicæ incrementum, majorem Societatis nostræ famam & honorem, majus etiam tum proprium, tum proximorum bonum ac emolumentum, ut in altero (in Indiis videlicet alicubi) orbe, longè majori cum voluptate intermissos hucusq; suavisimæ illius consuetudinis exigam fructus.

Id

Id enim sperare me facit continuum Charitatis Vestræ silentium, nullis unquam interpellationibus meis solutum; indignum fortassè ratur, verbis Augustino respondere ac literis, ac non reipsâ potiùs, imitatione ac opere. Quod si ità est, fratres mei gaudete! idem sapite! imitatores mei estote, sicut & ego Christi! qui cooperatus est mihi in Apóstolatum, cooperabitur & ipsis inter Gentes. Videat itaque unusquisque, quæ sit voluntas DEI bona, beneplacens, & perfecta, in quo vocatus est, permaneat apud DEUM, & satagat, ut per bona opera certam vocationem & electionem suam faciat. Quod si verò nunquam posthac nos, inter nos, nec in altero quidem mundo revisuri sumus, certò in cælo aliquando (ubi spero singulari DEI beneficio ac munere prius in Societatem suam simul vocati, dein etiam ad Societatem Civium Supernorum simul recepti, DEO perenni bonorum omnium fonte perfruemur in omnem aternitatem) nos revisemus. Ad extremum ad saluto quàm humillimè Patres nostros, fratres, notòsque omnes, omnium in Christo servus,

ac


*ac usque ad mortem, utinam & mortem.
Crucis, memor*

Indignissimus Marianarum Missionarius

CAROLUS XAVIER.

Seu

AUGUSTINUS IGNATIUS ALOYSIUS
STROBACH S. J. m̃p.



CAPUT X.

*Periculum gravissimum in egressu ex
portu Gaditano.*

QUicunque casus ex præmemo-
ratis *Venerab: Patrem Augustinum*
exercuerunt, lusus fuerunt, compara-
tione ad ictum ultimum, quo etiam
robur constantissimi pectoris cadere
potuit, dum nimirum jam altera vice
in eodem portu spes suas videret pro-
fundo in exhausto absorberi, legeretq;
in columnis illis Herculeis scriptum,
Non plus ultra. Sed lusus fuit & iste al-
D tissimæ

tissimæ providentiæ, quæ dum ducit ad inferos, etiam reducit. Res ita accidit.

Aderat tandem dies novæ in Mexico classi expediendæ decretorius; in unam navim, quæ *Nazarenus* vocabatur, collecti simul Missionarii, datoque signo ad levandas anchoras è sinu Gaditano velis explicatis naves sensim emovebantur, quando navis *Nazarenus*, alteri onerariæ, à qua periculum metuebat, locum datura, justo amplius ad dexteram declinans in *admantem* (scopulus est prægrandis & amplus, sub dolofo gurgite latens, in medio sinûs Gaditani) incurrit; mox diris convulsionibus, ex maris jactatione, scopuli verò, cui infixæ hærebat navis, pertinaci renitentia, fracto temone, gubernaculum in aquas ruens, & sentinæ alveus magno hiatu aquas excipiens, præfens omnibus annuntiabat naufragium. Ad quem casum *Ven: P. Augustinus* stetit vultu non mutato, fronte serena, toto tamen animo in

in preces collectus. Quid autem in animo suo pro eo articulo gesserit, dicam compendio, & ferme verbis ipsius; sic enim scriptum reliquit.


Ante omnia sibi in memoriam recurrisset, quam Telczii ab Instructore suo acceperat ultimæ doctrinæ locò tesseram: *Iustus meus ex fide vivit*. Hac voce in fiduciam erectus, in sinum pientissimæ Matris Virginis curam omnem deponit; certus etiam de præsidio S. FRANCISCI XAVERII: erat enim feria sexta, honori ejus sacra; & quia navis, quæ periclitabatur, pretiosum *Nazarenî* nomen ferebat, JESUM toto affectu ingeminans, in eam obduruit animi fortitudinem, ut videretur insultare periculo, quasi diceret: *fugite partes adversæ. Vicit Leo de tribu Juda*. Stetisse extra terrorem testantur ejusdem periculi Socii, testes de visu; & mihi pro maximo argumento est, quòd in fide nihil hæsitaverit. Atque ità intrà vitæ periculum salus omnium stetit, quos subsidiariæ scaphæ,

phæ , dum *Navis Nazarena* hæret in scopulo , exceptos, vita comite in portum revexerunt. Ubi nova illum procella excepit. Naves enim reliquæ, quia jam plenis velis propitios ventos excipiebat classis, cursum prosequabantur. Quid hîc consilii? Duo jam anni fluebant, quòd luctabatur cum terra & mari, patriam egressus, & portu egredi non poterat ad gentem, ad quam DEO lucrandam certus erat se à DEO electum. Durissimum fateor fuit hoc certamen spem inter & metum, sed in hoc non minùs, quàm in prioribus suû potens, stetit firmus, hac una cogitatione roboratus, *Iustus meus ex fide vivit*: nimirum non posse DEO deesse media, quibus Electos suos provehat in portum voluntatis suæ.

Et verò movit Divina Bonitas cor Procuratoris Generalis Indiarum, atque ità direxit, ut rebus sic desperatis ipsi consilium non deesset. Jubet igitur Missionarios conscensis scaphis abeun-

abeuntem classem remis insequi. Anteibat ipse, DEO à puppi aspirante, & dum jam huic jam alteri ex Missionariis, discurrendo per naves singulas locellum exorat, & impetrat, quæ primæ ipsi curæ erant, ut *Ven: Patrem Augustinum* de se adeò bene meritum, & in quo spes tantas conversionis Paganorum repositas sciebat, inter primos accommodaret, ex animi perturbatione ad ultimas se rejecisse, ut vidit, vehementiùs indoluit. Et jam quid ageret? & quidquid egisset, non potuit contra consilium DEI. Cujus voluntas erat, palàm facere, solius providentiæ, & dilectionis suæ fuisse curam de *Ven: P. Augustino*. Cùm enim P. Procurator apud amicos facilem exorasset admisionem pro aliis Missionariis, nullum vidit superesse præter Gubernatorem *Navis S. Joannis & Francisci Seraphici*, offensum sibi ex recenti adhuc vulnere. Erat enim ipse ille Capitaneus, cum quo Procurator primum convenerat de transvehendis

Patribus, sed cùm ex causâ ignota ab hoc contractu resiliisset, adeò acerbè id tulit Gubernator, ut videns appropinquantem in cymbula, obfirmato penitus animo statuerit, Procuratorem cum Patribus rejicere, & quovis etiam oblato pretio neminem ex Missionariis in navim admittere. Id quod ipse postmodum retulit. Verùm in manu Omnipotentis corda hominum, quocunque voluerit, flectet. Et sic accidit.



C A P U T X I.

Admittitur precariò in navim, sed sinè omni ad tam diuturnam navigationem præsidio.

POST iteratas, sed irritas semper preces, & amaro animo à Gubernatore rejectas, repentè tandem altiore instinctu immutatus Capitaneus, ad unum ex Patribus recipiendum, paratum se exhibuit. Restabant adhuc qua-

quatuordecim Missionarii, duos in cymbula illa advexerat Procurator, *Ven: Patrem Augustinum, & P. Josephum Neuman.* Cui ex his sortem faveret, hærebat anxius. Erant nimirum in virtute gemelli, & cor unum, & anima una. Utriusque admissionem urgere, erat idem, quod utrumque rejicere. Jubet igitur unum ascendere, neutrum ex nomine vocando. *P. Josephus*, quia proximus stabat scalæ, primus eluctatur, tunc primùm de *Ven: P. Augustino* sollicitus Procurator, hunc ex nomine vocat. Sequitur ille impigre. Ubi ambos Gubernator vidit in navem penetrâsse, negat rotundè utrumque se velle, quòd neque commeatus in tantam navigationem suffecturus esset, neque locus numerum admitteret; quod ultimum verissimum erat. Hinc nova lucta inter fidissimos Achates, & ejusdem propositi Viros. Ab invicem avelli morte durius; alterum loco detrudere, nimis Barbarum, cedere sortem propriam, non videbatur ca-

dere in deliberationē. Hanc luctam solvit humilitas utriusque, & per vultum latè diffusus pudor: quo conspecto delinitus Capitaneus, cū infuper audivisset, quovis navis angulo DEI servos, contentos fore, utpote qui aliud non contenderent, quā per ærumnas, & mortes, animarum salutem ad DEI unius gloriam promovere; ad hanc tam humilem deprecationem erectus in æstimationem zeli, simul perpendens, quid animi sui magnitudinem deceret, utrumque retinuit. Et jam rigore in humanitatem converso, blandè præmonebat, sibi non imputarent, quòd pro dignitate accommodari non possent.


Hoc periculo jam defunctus, dum secum in animo adeò singularem Divinæ dispensationis ordinem expendit *Ven: Pater, quā præclarè (ajebat) mecum agit altitudo sapientiæ. Ultimus enim cū sim ex omnibus, ultimus & precariò in delectu Missionariorum ad hanc gratiam admissus, ultimus etiam ad classē recipi debui,*

bui, tanquam omnium peripsēma. Strobach
enim Hispanicè redditum, Estropacho,
purgamentum sonat. Hunc animi sui
sensum dum in Europam perscribit 10.
Decembris 1680. addidit: sive probare,
sive coronare hanc oblationem nostram ad
quemvis navis angulum voluerit optimus
DEUS, velut condigno præmio, tali locello
contentos nos esse oportuit per totum navi-
gationis tempus, qui pro quiete non admitte-
ret, nisi culcitram uni suffecturam, utrique
tamen nostrum amplissimum fuit theatrum.
Situs autem erat magis incommodus, quia ad
limen camerae, ingredientibus & egreden-
tibus illius incolis diu noctūque pervius,
cum hoc boni meriti auctario, quod quoties
quietis tempore accessus petebatur ad came-
ram, alterutri ex nobis surgendum fuerit.
Instratus autem erat pro quiete solâ storeâ,
quo usq; supposita fuit culcitra; credebamus
Gubernatoris jussu, sed quod sub finem na-
vigationis primum cognovimus, scēmina
fuit Inda, & ipsa pauper, quæ miseratione
mota, suo se strato nostrî causâ privave-
rat.

Nunc

Nunc autem memoratu dignissimum est, cum quo apparatu Viri hi Apostolici navim ingressi sint, vel potius Europam egressi, & in alterum orbem transmissi. Sarcinulas omnes, ipsam supellectilem lineam, vestes viatorias, quin ipsum pileum, capitis tegumentum, Breviarium pro horis Canonicis, verbo, omnia in illa perturbatione naufragii post se reliquerant, in id solum intenti, ut classem abeuntem non negligerent, & nudum Christum nudi sequerentur. Quid ad hæc *Augustinus*? Non sinè gratia verba ipsius audientur: *Quod in navem intulissemus præter nos ipsos, fuit omnino nihil. Et vel ex hoc ipso majore cum jubilo, & gaudentes conscendimus navim; quia digni habiti, tanquam genuini Apostoli, & Discipuli Christi, sinè sacculo, sinè pera, ire ad prædicandum Gentibus Evangelium. Et mihi quidem præcipuo fuit solatio, Magno Indiarum Apostolo, Duci nostro, potuisse modo aliquo assimilari, non tantum sinè pera & sacculo, sed insuper sinè pileo & Breviario ex Europa tran-*

transire in Indias. Abundantiùs gaudebam, cùm memoriâ repeterem, primos è Societate nostra in Philippinas Insulas Missionarios, & hujus Missionis Fundatores, videlicet Patrem Antonium Sedenò, & Alphonsum Sanchez cum simili apparatu in Philippinas solvisse Acapulco, ex solis piorum navigantium eleemosynis vitam sustentantes.



CAPUT XII.

Defertur in portum Veræ Crucis, ac tandem in Mexicum.

SIC expoliati vehebantur in portum *Veræ Crucis*. Movit tamen summa Bonitas vectorum pietatem (ducenti & sexaginta erant in navi illa) qui certatim offerrent ad usum necessaria, *Cavalleri* in primis, tum ipsa plebs nautica; ex quibus tamen illa solum admittebantur, quibus carere, aut ampliùs non poterant, aut non sinè offensa, si per-

pertinaciùs respuerent. Maluisset autem *Ven: P. Augustinus* & his carere, dummodo copia ipsi facta fuisset, explendi famem spiritùs sacrificio quotidiano. Sacerdotes erant plures, ex quibus non nisi ex ordine duo admittebantur ad Liturgiam festis & Dominicis diebus. Intercurrebat festum S. AUGUSTINI; ô quantis tunc precibus egit, ut vices suas illi cederet Saccellanus navis!


Per reliquas naves distributi erant Sacerdotes reliqui de Societate; duodecim remanserant in portu Gaditano. Ventus aspirabat secundissimus, qui classem spatio dierum sex supra sexaginta, completis integre decem diebus XAVERIANÆ devotionis, in portum detulit *Verae Crucis*. In quem dum exscendunt sinè capitis tegumento, Patri Josepho Cavallerus, *Ven: Patri Augustino* Saccellanus navis pileum precariò obtulit. Dum in illo portu se conspiciunt decem Missionarii Sacerdotes (reliqui enim Sacerdotio necdum

dum inaugurati erant) singulari congratulatione in mutuos ruunt amplexus. *Augustinus* verò de illis sollicitus, qui in *Hispania* remanserant, gaudia sua hoc luctu miscuit, quem ex ejus Epistola exscribo: *Benedictus DEUS*, qui nos tandem ex diuturno illo desiderii nostri purgatorio ad optatissimam nobis terram promissionis, primum in *India* portū fecit appellere. Sacerdotes quidem decem: siquidem quod aliquando dixit *S. Philip. Neri*, decem homines, mundanis extricati curis, sufficiunt ad convertendū totum mundum. Sed sufficiant ad conversionem mundi hujus *Americani*, *Indias* intelligebat occidentales, alter adhuc superest *Asiaticus*, in orientalibus *Indiis*, ac vastissimo *Sinarum* & *Japoniæ* Imperio, ad quod facillimus ex *Philippinis* est transitus. Ah veniant relictī in *Hispania* *Socii* duodenario *Apostolorum* numero, ex quibus cū gemini ad has missiones pertineant; reliqui decem conversionem urgeant mundi *Asiatici*. Itā *Fratres Charissimi* oremus pro *Fatribus nostris absentibus*, ut omnes digni efficiamur pro *Missionibus Christi*. Post

Post non longam moram in portu S. Crucis, iter reliquum Mexicum usque, terrestre excurrerat. In primis se offerebat planissimus campus ad quinque circiter leucas protensus, usque ad diverforium *Martinez* dictum, in quem locum ut pedem intulit *Ven: Pater*, sensit repentinam virium dejectionem ex dysenteria cum vomitu, ac continuis deliquiis. Quem morbum Indigenæ *Miserere* vocant, quod ut plurimum hoc sequatur canendum, prout pridie factum cum altero ex comitibus. Tres adhuc erant leucae *Theyolucam*, quod prædium est *Angelopolim* pertinens ad *Collegium Sancti Spiritus*. *P. Martinus Prado*, qui ad Sanctam Crucem in occursum venerat ad novos ex Europa Missionarios salutandos, & cum charitate deducendos, non modicum contristatus ex repentino hoc casu, ceteris iter prosequentibus, *P. Tilpe* cum *Charissimo Simone* subsistere iussit, qui curam agerent infirmi, dum ipse de remediis provideret. Dies erat

XAVE-

XAVERIANA, feria nimirum sexta,
 sacra sanctis Medicis *Cosmæ & Damiano*,
 anniversaria natæ confirmatæque So-
 cietatis, & nisi hæc fuissent corpus &
 animum confortantia de coelo phar-
 maca, *fieri omnino poterat* (scribit ille)
ut & mihi decantassent psalmum Quin-
quagesimum. Cum quiete respirare cæpi,
veneruntque sub noctem ex Angelopolitano
prædio Indi octo, qui me die altero, in fere-
tro pro more Regionis illius, ad socios de-
portarent. Sabbato deferebatur vivum hoc
 funus, succedentibus sibi per vices bajulis
 quatuor; & quis pudor? prius fatigasse
 Indorum humeros, quàm in meos suscepis-
 sem. Patientiâ opus fuit. Hunc illi
 characterem impresserat pes primus,
 quem in Veram Crucem posuerat.
Delatus in hunc modum Festo S. Wenceslai
Martyris (pergit ille) *ad prædium, diem*
unum lectulo affixus egi, religiosæq;
charitatis obsequiis respirare
cæpi.



CAPUT XIII.

Quies minimè otiosa, & sancti in Mexico labores.

PRævolârunt Nuncii *Angelopoli*, qui ferebant, adesse tanto tempore expectatos ex Europa Missionarios. Fit congratulatio, & concursus ad Domum Professorum Societatis in Mexico, dum singuli pro affectu ambiunt prævenire officiis tam chara capita, quos scirent, & oculis suis jam coràm viderent ex remotissimis Germaniæ finibus, ditionibus Augustissimæ Domûs Austriacæ subjectis, tot, tantisque terrâ, ac mari bienniô superatis periculis, tanto delectu, tandem advenisse in salutem Gentium, & Divini Nominis majorem gloriam propagandam. Tempus erat, ut tantis itineribus, per tot casus fatigati, corporibus curandis quietem concederent. Verùm id minimè licuit; ipsa enim mora temporis fecit, ut majus fierent

fierent spectaculum Urbi frequentissimæ; & quò jam familiariùs servis DEI utebantur, hoc confidentiùs cum illis conscientiæ negotia conferrent. Minimum otium fuit *Ven: P. Augustino*, qui cùm characterem sanctimonici referret ex vultu, profestis æquè ac festis diebus detinebatur à poenitentibus in Ecclesia, evocabatur ad infirmos in Nosocomiis, ad moribundos præcipuè, ad quos accurrebat impigre, solabatur amplissimè, & ad ultimum agonem, velut Angelus confortans cùm gratia singulari disponebat, nemine non, ex iis, quæ pro illo articulo afferebat in medium, spiritum quo ipse & viveret, & operaretur, conjectante: sic de illo scribit ejusdem in Mexico individuus à latere comes. Quo fiebat, ut *Ven: P. Augustinum* & amarent, & optarent conscientiarum suarum Directorem, & ipsi domestici, & multò ampliùs externi: & hi catervatim accurrebant, conscientiæ rationes cum illo componentes, affluxu tanto, ut in


E plures

plures horas pro sacro Tribunali attinerent. Ex domesticis verò non pauci à Superioribus exorabant veniam, ut negotia spiritûs, dum per moram illam temporis liceret, cum Viro illo agere possent, quem solo spiritu vivere cognoscerent. Id quod cum pari fructu ac solatio præstabat. Atque ità impletum fuit, quod Vir ille Nobilis in Bohemia dixerat, *solum Ven: P. Augustini aspectum, ipsis etiam Barbaris futurum magnum veræ fidei argumentum.* Sed qui familiariùs eo utebantur, alio attrahebantur magnetismo, quòd nimirum non aliâ loqueretur linguâ, quàm cordis, neque abscondere posset ignem, quo intus ardebat, desiderium illud vehemens, fundendi pro Christo sanguinis. Invitatus ad spectaculum, quod in Ecclesia Domûs Professæ parabatur Pro-Regi, saltum scilicet Eucharisticum, deprecatus fuit, quòd, cùm Vigilia esset Immaculatæ Conceptionis DEIPARÆ, detenti in carcere illum pro suis confessionibus expetivissent.

vissent. *Et quid, ajebat, Augustino cum saltibus, quem non nisi compedes manent, & vincula? Sinite me compeditis, quæ possum præstare obsequia, ut ab illis referre merear pro stipendio, quas pedibus & manibus gestant catenas.*

Majus adhuc in ipso aliquid observavit Mexicum, futurorum scilicet præfagam mentem, & arcanorum consciam. Dum enim animarum lucro intentus, urbem circumit, repente vultu ad socium converso; *agamus, ajebat, Charissime, acceleremus gressum, domus enim, quam digito designabat, nos expectat.* Nunquam prius notatus fuerat in domum illam pedem intulisse, nunquam prius habebat cognitam, & à more ejus alienum penitus erat, ad domos sæcularium, aliâ, quàm procurandæ salutis proximorum causâ, si invitaretur accedere. At ecce in primo ingressu domûs illius in hominem incidunt non visum hætenus, citatis adeò passibus ad æternitatem properantem, ut aliud illi tempus non

superfuerit, quàm quo animum à no-
xis expiare posset; cui cùm hoc ulti-
mum obsequium impendisset, in ma-
nibus *Ven: Patris* vivere desiit. Ex quo
articulo didicit socius, quo lumine il-
lustraretur, & spiritu regeretur Vir
DEO conjunctissimus. Saluberri-
mum verò hoc regendarum in con-
scientiæ foro animarum munus, pari
felicitate & fructu continuavit in *Aca-
pulco* novæ Hispaniæ Australi portu, &
ultima navigatione in *Philippinas*, cum
ægris in primis, & in ultima lucta la-
borantibus.



C A P U T XIV.

*Navigatio ultima ex Acapulco in Philip-
pinas & Marianas Insulas.*

PRO transitu ex hoc ultimo portu
ad Insulas Philippinas & Marianas,
designata fuit 27. Martij, qua tamen
die vela facere non poterant, quia nec-
dum venerat hora ejus. Ità in diario
suo,

suo, in quo beneficia cœlestia anno-
tabat, ipse scriptum reliquit: præpla-
cuisset DEO eligere diem posteram,
quæ fuit 28. Martij. Et fuit dies hoc
calculo digna. Erat enim dies anni-
versaria, quâ ante biennium in nume-
rum Missionariorum pro Insulis Ma-
rianis admissus fuit, in quam insuper
anno illo incidit Festum Dolorum
Compatientis DEIPARÆ Virginis, &
(quod in primis gratiis referebat) FERIA
sexta, atque adeò XAVERIANÆ devo-
tionis. Hac igitur die cum Sociis per
naves distributis, portum *Acapulca-*
num egressus (angustum sanè, & in
egressu imprimis difficilem, multisque
illustribus naufragiis celebrem) in al-
tum rursus abiit sub præsidio Matris
Dolorosæ, dictâ ab omnibus qui unâ
vehebantur, antiphonâ *Salve Regina*,
ad quod *Salve*, MARIA ex suis Insulis,
post paucos dies gratissimum omnibus
reddidit *Ave*. Cùm enim sinus ille
maris ob circuitum, & perplexos mæ-
andros, vix unquam superari possit

breviori quàm mensis integri labore, aut si faveat aura propitia, viginti quinque dierum spatio; intrà duas hebdomadas cursum hujus itineris absolverunt, & II. Aprilis, quæ iterum erat feria XAVERIANA, *Brissas* portum ultimum attigerunt. Non hìc me detineo, ut referam quæ hoc itinere egerit, properans ad gaudium illud, quod omnibus attulit primus Insularum Marianarum aspectus.

Brissas transgressi ab Aprili usque in Junium altum tenuerunt mare. 13. erat Mensis Junij, D. Antonio, quem etiam in foro solenni ritu celebrat *Marilya*, sacra, sed magis D. XAVERIO, cùm esset feria sexta. Duabus ante ortum Solis horis, sic, ipse retulit; *visæ nobis sunt Marianæ Insulæ; qui primus vidit, nauta erat Lusitanus, cui Sanctus Antonius tanquam conterraneo suo oculos aperuisse videtur, ut primus nobis desideriorum nostrorum patriam ostenderet. Hoc nuncio in proram evocati omnes plausum dedimus cum dulci jubilo. Mox ex Prætoria, ære cam-*

campano signum datum pro reddendis DEO & DEIPARÆ gratiis. Sacra solennia ad Musicam, quæ ad psalterium seu harpham fiebat, decantata quinque, lecta quatuor, inter festivos ignes militum. Observavit autem singulariter *Ven. P. Augustinus* diem fuisse duodecesimum XAVERIANÆ devotionis, à quo ex portu Acapulcano solverant: sed quia intercesserat Parasceve, & duodecesimus cecidit in gratiarum actionem, decadem integram XAVERIANAM fuisse durantis beneficii.

Sic ingressus est designatam à DEO provinciam. Quamvis non deessent qui magis optarent ad Philippinas Eum deportari, velut ad agrum jam magis subactum pro semente Domini. Magnis tamen precibus obtinuit, ut relinqueretur in loco, quem Patris Nostri Generalis mandato sibi determinatum noverat. Atque ità in Marianis Insulis substitit cum *P. Joanne Tilpe*, accedente deinceps ex illis, qui in Hispania ex naufragio remanserant, *P. Mathia*

Cuculino, tres primi ex Bohemia in his Infulis Apostoli: Quorum prima cura fuit linguis loqui Gentium illarum. Quanto labore, & quàm felici successu, dabit Epistola Vice-Provincialis *Ven. Patris Emmanuelis de Solorzano*, quam dedit 20. Maij Anno 1682. in Bohemiam, & quam integram refero; inscripta fuit ad Præpositum huic Provinciæ.

Reverende in Christo Pater, PAX CHRISTI.

Obligationis meæ est, refundere, quas possum, Reverentiæ Vestræ gratias pro duobus Sacerdotibus, *P. Augustino Strobach*, & *P. Joanne Tilpe*, qui è sancta sua Provincia huc ad nos, appulerunt, & adventu suo Missionem hanc Marianam magnopere exhilarârunt. Præterquam enim, quòd linguâ Castellanâ tam bene instructi advenierint, ut Præsidio huic Catholico utilem mox operam locare potuerint: etiam novæ huic Christianitati usui quàm primùm, & utilitati

tati futuri, in linguam Marianam ita statim incubuerunt, ut paucorum mensum intervallo tantam peritiam ejus indepti sint, quanta catechizandis hisce Insulanis, & adjuvandis Veteranis Vineæ hujus Operariis suis in laboribus sufficiat. Felices sanè suppetias, & Missioni huic illo etiam titulo perquam proficuas, quod prius paucorum Operariorum numero circumscripta, vix administrandis Insulæ unius Residentiis suffecerit: nunc verò hoc novo è subsidio vires sumserit, non tantum istas ritè administrandi, sed ad alias etiam Insulas feliciter sese extendendi, & alias atque alias Residentias fundandi. Quibus omnibus magnum in nobis excitârunt desiderium, plures ex sancta sua Provincia evocandi, & expetendi, similes iis Operarios. Et utinam venirent quàm plurimi ad has latè sparsas & ad messëm albißimas Insulas, ubi experiendorum laborum Apostolicorum occasio plurimæ est, & frequentissîma. Speramus proinde fore, ut nacta opportunitatem Reverentia Vestra, novis nos suppetiis recreet, precamurq; communem Dominum, diu nobis, sanctæq; suæ
Pro-

*Provinciae salvam, incolumemque velit
Reverentiam Vestram. Sanctis Ejusdem,
ac omnium RR. Patrum Sacrificiis, nec non
devotis Charissimorum Fratrum orationi-
bus Missionem hanc Marianam, & felices
ejusdem progressus, enixè commendo. In
Insula S. Joannis, & principe ejusdem
Residentia Agadnensi, 20. Maij, Anno
1682.*

Reverentiæ Vestræ

Servus in Christo

EMMANUEL DE SOLORZANO.

CAPUT

C A P U T X V .

*Brevis relatio de statu Insularum Marianarum, in quo illas invenit Ven:
P. Augustinus.*

MEnfis erat Junius Anni 1681. dies 13. quo primo harum Insularum aspectu recreatus fuit; quintus verò supra decimum, quo excensionem in illas fecit, anniverfarius nimirum quo Ven: P. Ludovicus de S. Victore, anno salutis 1668. primus harum Insularum Apostolus possessionem earundem adiit, & Evangelii vexillum in illam Barbariem extulit. Quas ab eo tempore Missionarii Evangelici primis fidei rudimentis excoluerunt, 13. numerant; Sunt autem plures contiguæ, quæ adhuc culturam expectant.

Harum omnium præcipua, Barbaris *Iguan*, Hispanis *S. Juan*, sive *S. Joannis* Insula dicitur; hæc quemadmodum ceteris major, ità & populosior, etiamnum sex hominum millia numerat,
cùm

cùm in aliis singulis pauciores longè sint: plurimis, tum contagione, tum intestinis bellis, tum etiam frequentibus soli & Coeli mutationibus, ereptis. Attingit hæc Infula altitudinis gradum 13. 25. minutum.

Ab hac 7. levcis distat Infula *Rota* five *Sarpana*, nunc Hispanis, ob nominis affinitatem, *S. Annæ* dicta, in 14. gradu altitudinis. *Tertia Agiguan*, nunc ab *Angelo Custode* nomen sortita; 14. gradum altitudinis, 30. minutis excedit. *Quarta Tenian*, quod interpretari licet *Benam Cistam*, recedit ab Infula *S. Annæ* levcis 14. sub 14. gradu min. 10. Ab hac tribus levcis jacet *Quinta Saypan* dicta, nunc verò *S. Josephi*, in 15. gradu, min. 20. Ex hac 30. levcas numerant in *Anataban*, quæ est *sexta*, jam in 17. gradu min. 20. posita, & nomen accepit à *S. Joachimo*. Sub eodem gradu, min. autem 35. continetur *septima*, *Sarigan* vulgo, nunc *S. Carolo* sacra, distat ab *Anataban* levcis octo. *Octava Guguan* nuncupata indigenis, Hispanis *S. Philippi*

lippi Infula, dividitur à *Sarigan* levcis
 sex, in 17. gradu altitudinis, min. 45.
Nona olim dicebatur *Alamagan*, hodie
 de *Conceptione B. Virginis*, levcas nume-
 rat 12. ab *Anatahan*, & attingit gradum
 18. min. 10. Post hanc sedecim levcis
 se offert *decima*, *Pagon* à suis, à nostris
 S. IGNATII dicta in 19. gradu. Huic
 opposita est intervallo 12. levcarum,
Undecima, nunc quidem S. XAVERII,
 olim verò *Agrigan* vocitata; superat 19.
 gradum, 40. minutis. *Duodecima* du-
 plex nomen à Barbaris fortita, *Belean*
 primùm, deinde & *Songeon* dicta, hodie
 nomen retinet ab *Assumptione B. Virgi-
 nis*; distat ab undecima, levcis 12. & à
 latere habet alias parvulas Insulas ad
 spatium 5. levcarum, sita in gradu 20.
 altitudinis, 15. minuto. *Decima* ter-
 tia componitur ex tribus minoribus
 Insulis quas *Tinas*, five *Maug* vocant,
 Hispani Insulam S. *Laurentii*, in 20. gra-
 du, 35. minuto. Hæ sunt Insulæ, quæ
 jam sub falcem Evangelicam vene-
 runt; nam reliquæ, quæ ad Austrum
 ex-

excurrunt, necdum habent terminum cognitum, uti suo loco dicetur.

Hic situs Insularum Marianarum. Regio verò admodum salubris est, neque æstus habet excessivos, neque frigora; solum etiam à terræ convulsionibus, sive motibus liberum. Jacet tamen sub flagello ventorum, & vehementes æquè, ac crebros patitur turbines, Typhones vocant, qui quotannis per sinum illum maris procellas dant ineluctabiles, *quales* (scribit Ven: P. Augustinus) *& nos tum anno 1681. tum mox insequente 82. magnâ tum segetum, tum domorum ruinâ experti sumus. Utrumq; Typhonem ego in Residentia Divi JOSEPHI sustinui; & primus quidem ruinam solùm minitabatur Templo, & domui, alter verò utrumq; ædificium evertit, me tamen cum domesticis, qui tunc intrâ domum inventi fuimus, salvo, & incolumi; in aliam nimirum sortem servabamur. Aquas habent salubres, & ad abundantiam: sola enim Insula S. Joannis, quæ ad 40. circiter leucas protenditur,*
trigin-

triginta & plures fluvios numerat, piscium bonorum feraces. Infecta in his Insulis propè nulla, neque aspides; aranei finè veneno, quibus & vescuntur incolæ. Maximum tormentum à culicibus. Et cùm à Solis æstu nihil incommodi accipiant Indigenæ, à Luna tamen gravissimas patiuntur in corporibus vicissitudines.

Gleba utcunque fertilis, nam agri modicâ culturâ adjuti fructum reddunt intrà annum, triplicem, & pluribus locis etiam quadruplicem. Sunt autem fructus his Insulis proprii: *Coco*, *sandia*, *pepones* raræ magnitudinis, *plantani*, *papayæ*, *mayr*, sive triticum (quod in Europa Turcicum vocatur) & *oryza*, quæ tamen neque in omnibus Insulis proficit, neque tam bonæ conditionis, uti in Philippinis. Nullum, ante adventum Europæorum in his Insulis videre fuit terrestre animal; nunc verò, & equi, & boves, & capræ, & oviculæ copioso fætu multiplicantur. Victus illorum ut plurimum ra-
dices

dices sunt; oryzâ non nisi solennioribus diebus, putà in Exequiis suorum, utuntur; piscibus crudis plebei.

Quàmvis enim Barbari sint, & nudi penitus ante illatam Christi fidem in-cesserint, distinguebantur tamen, more ferè Sinenfium in triplices familias; summam, mediam, & infimam. Summa æquivalet Optimatibus, quos & *Matoas* vocant, sive Dominos; Media Civibus; infima plebeis. Hæ familiæ non commiscuntur, nec in matrimoniis, nec in aliis contractibus. Neque cibis vescuntur, quos inferiores contrectaverint, neque aquas haurient ex puteis, quibus utuntur plebei. Ob quam causam sub initium prædicati Evangelii admodum difficile fuit in unam illos Ecclesiam cogere; vehementius verò abhorrebant, uno, eodémque sacro fonte ablui. At nunc fastu illo deposito, communem agunt vitam, &, si interrogentur, quo pacto induci potuerint ad hanc consuetudinem, respondent id se didicisse ab exem-

exemplo Præconum Evangelicorum, quos tot annorum experienciâ observaverint omnibus promiscuè, & æqualiter se communicare.

Nulla habuerunt Religionis alicujus exercitia, nulla Idola, atheis similiores, qui nullam veri DEI notitiam admiserint. Circa defunctos tamen religiosiores erant, siue id terrore fecerint dæmonum, sub his larvis spectabilium, siue naturali horrore; nam & de cibo, quem in dies sumunt, defunctis de familia bonam partem reponebant, & sepulchra eorundem calcare, piaculo ducebant. Ex qua ratione longo tempore mortuos suos in Ecclesiis sepeliri deprecabantur, nè scilicet conculcarentur à populo. Osibus tamen mortuorum utuntur pro jaculis, & quovis è corpore duodecim ferè lanceas conficiunt, ex illis inprimis, quos violenta morte sustulerint. Quàm enim humani sunt in defunctos de familia, tam crudeles in vivos, & hostes. Dominatum in familiis ha-

F bebant

bebant scēminæ; & quamvis non con-
viverent promiscuè, rescindebant ta-
men Matrimonia pro libidine: infames
insuper à commixtione cum dæmone
incubo.

Unde originem suam ducant, adhuc
incertum; proximè accedunt & mo-
ribus & idiomatis affinitate ad gen-
tem, *Tayala* dictam, Philippinis con-
tiguam. Neque credebant extra suos
fines aliam terram, aliam gentem in-
veniri. Sed cū viderent navigiis
Europæis alios homines advenire, il-
los dicebant à suis originem traxisse,
procreatosque à Rupe in Insula sua
præeminente, ut quæ priùs homo &
ipsa fuerit, temporis verò vetustate
in petram induruerit, & continuo
partu alias, & alias gentes effundat.
Plures ex illis nascuntur monstrosi
cum sex digitis in pedibus. *Vidi ego
ipse* (scribit Ven: P. Augustinus) *in Re-
sidentia sinè labe Conceptæ Virginis, ado-
lescentem, in cujus facie, neque oculi erant,
neque nares; sola oris lineamenta, ceterum
plana*

plana instar tabulae rasæ. Qui tamen, cum Christianis accessit, ad Ecclesiam ibat sine duce, sine comite, sine baculo, nullibi in via aut errans, aut offendens. Capite sunt rasæ, in vertice tamen comam alunt in cuspidem assurgentem.

Prius rupes, & petras incolebant, nunc quævis familia duo incolit tuguria utcunque nitida, ac munda. In altero rem domesticam conservant; in altero cibum & somnum capiunt. Hæc domus interiùs storeis undique investitur. Magistræ texendarum storearum foeminæ sunt. Quidquid autem supellectilis domesticæ est, totum est ex storeis, cistæ nimirum, orbes, scutellæ, quæ tanto artificio parantur, ut quemvis liquorem, oleum, jusculum, continere possint. Balneis utuntur quotidie, quotidie oleo corpora illinunt, ex quo magis, quàm ab æstu solis nigrescunt. Genio sunt barbaro, & feroci, ad seditiones, cædes, & bella intestina prono. Unde & nomen his Insulis adhæsit *de los Ladrones*. Hinc illæ tem-

pestates, quibus à primis suis natalibus sancta Fides in his Insulis usque ad hæc tempora concussa fuit, dum identidem perduelles in pristinam barbariem relapsi, internecione ultima exterminare conati sunt salutis Ministros, & veræ Religionis præcones.

Ad hanc barbariem exscindendam Reges Catholici ingenti prorsus ærarii Regii profusione, arma primùm expediverunt, tum ex Societate JESU elegerunt òperarios: quorum prima cura fuit, Barbaros ex spelæis, & antris protractos ad vitam communem provocare, in cætum unum cogere, cætus ordinare in pagos, ex pagis formare quandam Rempublicam. Quod ut meliori successu fieret, Insulam ex reliquis vastissimam elegerunt velut in Metropolim, *S. Joannis*, vulgò *S. Juan*. In hac Insula Prætor sedem fixit, Castrum exstruxit more Europæo, cum vallis, & propugnaculis ex solido lapide; juxta illud Residentiam amplam, velut Seminarium Missionariorum,

cum

cum Ecclesia, & Collegio Juventutis Marianæ. Quod ipsum dum attentant in aliis Insulis, advertunt labore improbo se confici; cùm nec operarios haberent pro tantis terrarum spatiis, neque milites pro præsidiis, neque navigia pro trajectu maris. Igitur ex communi consilio Prætor cum Vice-Provinciali (est enim solùm Vice-Provincia, & quasi colonia Philippinarum) decernit, Insularum jam cognitarum populos suavi modo, ad quatuor, aut quinque præcipuas reducere, & in his ipsis Insulis ad pagos etiam pauciores; frequentiores tamen, ubi per glebæ fertilitatem liceret; ut sic & gentes illæ faciliùs gubernari, solidiùs in rebus fidei instrui, & mutuis exemplis, velut carbones igniti conceptum fervorem fovere, ac ipsi demum Missionarii, tum gregi suo, tum sibi invicem pro rerum exigentia succurrere possint.

Has intentiones strenuè promovit prænominatus *Ven: P. Emmanuel de So-*

lorzano, cujus epistolam habeo in hoc argumento datam Anno 1681. 25. Maji ad Provincialem Philippinarum R. P. Joannem Andream Pallavicinum, quâ imprimis exorat navigium majus, ad perterritandam viam *Australem*, & ambitum Insulæ *Forres*, tractumque totum illum *Austrum* versum, de quo certas jam habebat notitias, inveniri nimirum in sinu illo gentes longè mansuetiores, decenter vestitas, quæ & sub lege vivunt, & Regem agnoscunt, qui reliquis imperat: & cum variis etiam mercibus abundant, in spem venerat, aperiri posse ostium commercio cum Philippinis Insulis, ex quo & hæ omnium pauperrimæ, quas jam Christo subjecerant, tum nuditati suæ prorsus verecundæ, tum reliquis ad vitam necessariis opportuna subsidia obtinere; & illæ, quæ ad *Australem* plagam jacent, multæ ac grandes, & quarum adhuc terminum deprehendere non licuit, ad Messem Evangelicam disponi possent.

Ab Infula *S. Joannis* transiverunt ad Infulam alteram *S. Annæ*, vulgò *Sarpanna*; deinde in *Tinian*, & *Saypan*. Infula *S. ANNÆ*, alio adhuc nomine *Rota* dicitur, quæ quidem culturæ Evangelicæ pertinaciùs restitit sub principium, lætissimos tamen postea fructus dedit; & ultimus fuit laborum campus *Ven: P. Augustino*. Ad quem dum redit historia: lubet ex ejus epistola, quam ultimam dedit ex pago *Sosa* Infulæ *S. ANNÆ*, 21. Maij 1683. referre quandam velut apologiam pro innocentia Societatis contra obtrectatores, & famæ alienæ lividos direptores, qui perſvadere jam voce conabantur publicâ, ingentem auri, & gemarum copiam esse debere in Marianis Insulis, quòd in illis tam operosè se occupet *JESU* Societas. *Ingens est hæc*, (scribit ille) *non solum in Missionem nostram, sed universam Societatem injuria, & calumnia, quâ gloriosos Majorum nostrorum labores dedecorare nituntur. Aliæ hic divitiæ non sunt quàm animarum, barbaræ*

hujus gentilitatis ; ceterum nudæ , & humanis commodis propè omnibus spoliata. Animæ pretioso DEI Filii Sanguine redemptæ , hæ sunt margaritæ illæ pretiosæ , & thesauri incomparabiles ; quas ut ex perditionis baratro erueret , nulli omnino labori pepercit Societas , mille subiit vitæ pericula , imò vitam dedit , & sanguinem Illustrium Filiorum suorum , prout testantur sex ex primis Missionariis crudeli nece interemti. Hæ margaritæ Regium Majestatis nostræ diadema longè exornant augustius , quàm pretium omne lapidum , quos toto orbe conquiſſeris. Ad historiam redeo. Tam læta Christianitatis initia adversitatibus provehi oportebat , & ut radices agerent , sustinere turbinem.



CAPUT XVI.

*Excitata gravissima persecutione, nova
incrementa sumit Sancta Fides.*

Nullus finus maris dat frequentiores procellas, quàm qui arctiùs à continente stringitur, & copiosioribus Insulis, velut habenis, coërcetur, id quod nôrunt omnes, qui mare navigant. Ex qua ipsa causa fretum Marianum continuis propè æstuat tempestatibus. Imago ad vivum exprimens mores populi sui, & motum illum passionum, quo identidem jactatur necdum satis domita barbaries; sub principium maximè, dum vi compelli debet sub jugum Christi. Quamvis enim tranquillitatem spondeat, nè fide huic malaciæ, momento mare vertitur, & ubi luserunt, sorbentur navigia. Necdum naturam exuit, quâvis undâ mobiliior barbaries; si vel unus ex adverso afflet seditiosus turbo, unda undam, fluctus fluctum, pro-

procella procellam trudet, quousque perduellione turbentur omnia. DEO tamen protegente, hac vice furor ad communem insurrectionem non venit, plurimi tamen in facinus conspiciunt. Dicam in compendio; populus ille, qui tanto labore ex cavernis, in quibus pecudum agebant vitam, extractus fuit, & ad mansuetudinem Evangelii excultus, semper aliquos retinuit primæ indolis Barbaros, qui per intervalla sollicitabant corda reliquorum, ut se in pristinam vitiorum libertatem, & vivendi licentiam restituerent, neque paterentur violentiam legis Christianæ, carni, & sanguini adeò contrariam. Hoc classico resonante, primum furorem in auctores suæ servitutis, Prædicatores Evangelicos exerunt: quos ex infidiis aggressi, nihil tale metuentes, diversis in locis, crudeli morte in fidei odium è medio tollunt; sex imprimis: *P. Didacum Ludovicum de S. Victore, P. Sebastianum de Monroy, P. Antonium de S. Basilio*

filio cum aliis Sociis. Contra quam ferociam, ut Prætor reliquum gregem pro officio tutari posset, petit ex Philip-
pinis, & impetrat suppetias militares, quibus in primis præsidium in Agad-
na corroborat, ex quo velut Equo Trojano necessarius terror propaga-
retur in totam provinciam. *Plures* enim, ut loquitur S. AUGUSTINUS, *con-*
tinet timor. Simul eodem tempore in Infula *Saypan* aliud castrum tumultua-
riè ejici jubet ex mole terrea, regulari septo ex truncis arborum præmuni-
tum. Cui præfecit Virum ex paucis strenuum *D. Josephum de Quiroga*, &
Loffida Nobilem de *Gallicia*, vetera-
num Ducem, magni tum in Belgio,
tum Hispania à peritia rei militaris,
jam nominis; sed quod caput omnium
erat, vitæ prorsus exemplaris, gloriæ
DEI, & salutis Barbarorum zelantissi-
mum, quam illi laudem scripsit *Vener.*
P. Emmanuel de Solorzano. Hunc Du-
cem prius, quàm ad constituendum
castrum alterum dimitteret, cum lecta
cohorte

cohorte jubet in authores seditionis totâ latè provinciâ inquirere, comprehensos exscindere, seductos forti manu ad pristinam DEO, & Regi obedientiam compellere. Qui illico castra posuit in monte *Maxaute* dicto, ex quo emissis in omnem viciniam copiis, recessus Barbarorum penetrans, & terrore præoccupatos, & magis flagitii horrore, oblata etiam spe gratiæ, faciles jam in venabula sua pertraxit, advolutos pedibus, veniam temeritatis exorantes, fidemque primam DEO, Regi subjectionem, Ministris Evangelicis promptas aures, renovato jramento spondentes. Quod ut ostenderent ex animo verè contrito, se agere, ultro ad Præfectum adducebant malorum omnium authores, & homicidas, ut justis pœnis plecterentur. Sic fiebat per omnes Insulas; nam & *Rotenses*, ut vim armorum à se averterent, & promeritam castigationem, submissa legatione rogabant supplices, in fidem, & protectionem Hispano-

spanorum admitti, in contestationem prompti obsequii offerentes Caput flagitiosorum, hominem improbissimum, *Mantapanus* dictum, parricidam *Ven: P. de Sant Vittores*; quem vivum quidem in navim projecerant, sed tot plagis jam multatum, ut infelicem animam finè remedio priùs ejecerit, quàm in terram deportaretur. Similiter Incolæ ex pago *Jarragui*, geminos percussores *Ven: P. Antonii de Basilio*, vivum alterum, alterius cadaver protulerunt.

Cùm autem Præfectus militum ad quietem toti regioni postliminio reducendam, cognovisset, necesse fore ex primis, ut *Rotam* Insulam, nidum, & receptaculum latronum, armata manu percurreret, summa celeritate eò arma convertit, ubi exustis pagis aliquot facinorosorum, comprehendit occisores *Ven: P. Sebastiani de Monroy*, & alterum bipedum sceleratissimum *Aguarin* dictum, qui fax erat, & incendiarius ad omne scelus, prout ab ipsis populari-

pularibus suis compellabatur. Flagitiosis in hunc modum excisis, cum reliqui jam sponte ad officia pietatis poenitentes redirent, victor in *Agadnam* rediens, Magnæ DEI Matri, sub cuius gloriosis auspiciis hanc expeditionem susceperat, vota exolvit. Et ut non superessent flagitiorum irritamenta, ipsa receptacula Barbarorum, petras, & rupes vectibus ferreis perfregit, ac evertit, sic, ut viam sterneret Equitatu in omnem partem Insulæ permeabilem. In quo opere Dux ipse primus manus applicuit, milite ad Ducis sui exemplum fortissimè pios ausus prosequente. Simul reflorescere cœperunt Residentiæ Prædicatorum Evangelicorum, & cultus divinus velut postliminio redire. Atque ità secuta est tranquillitas pristina usq; ad annum sæculi huius octogessimum quartum.



C A P U T X V I I .

*Industriæ , quibus usi sunt Missionarii
ad restituendum Sanctæ Fidei
splendorem.*

UT deinceps meliùs in officio retinerentur Neo - Fideles , reducti sunt iterum ad suas colonias , & in pagos divisi. In pagis verò singulis , more in Europa consveto , nominati *Judices* , quos *Rectores* vocant , qui ad manum essent Gubernatoris pro externo regimine , & imperata ad suos deferrent , & executionem perurgerent : faciliùs enim à popularibus imperia suscipiunt. His adjuncti sunt pro numero , & multitudinis exigentia duo , aut tres , velut *Æditui* , qui Missionarios in suo munere adjuvant. Horum munus est , convocare cætum ad Ecclesiam , & doctrinam Christianam , invigilare moribus populi , monere Missionarios de infirmis , periclitantibùsque ex partu ; diebus Festis ac
Domi-

Dominicis prælato vexillo doctrinæ capita præcinere, dum pulchro ordine deducunt populares ad Divina officia; & in ingressu Ecclesiæ præorare, atque ex formula recitare contritionis actum. Quod ipsum faciunt per singulas familias, dum ad somnum se disponunt; decantant enim dogmata fidei, & bis in hebdomade adulti ad unum omnes interfunt sacrae doctrinæ, feriâ quartâ, & sabbato; parvuli verò catechizantur in dies singulos. Quod tanta Religione præstant, ut, si quando impedimentum occurrat, præmoneant, rogéntque priùs Patres, ut ipsi discernant: utrùm idonea sit causa absentia. Quâ continuâ culturâ mirificè proficiunt in mansuetudine Christi.

Maximus verò labor est in procurandis vestimentis, nè uti priùs toto corpore nudi procedant in publicum; cum lumine enim fidei amor etiam verecundiæ crescit. Cui egestati, ut quovis modo occurrant Missionarii, quan-

quantâ curâ possunt, gossipii seminationem, & œconomiam promovent; docentque ipsi expurgatum fruticem in fila ducere, fila in telam & pannos contexere, omnibus omnia facti, ut omnes lucri faciant. Advehuntur quidem ex Philippinis subsidia aliqua in opera corporum: sed ut pro tanto populo, qui in dies augetur, sufficiant, sperandum non est, nec ærarium Regium sufficeret, neque ratio politiæ id patitur; nisi enim ipsi assvescant suis necessitatibus provide-
re, nunquam in cultos mores transibunt. Inprimis autem Juventus, quæ in Seminariis sub Patrum cura, & institutione in spem optimam educatur, ad has artes ediscendas applicatur, illo profectu, ut jam complures & manu peritâ fila ducant, & pannos sive telas contexant. Sunt enim meliorum etiam disciplinarum capaces, si modò Magistri pro instructione adessent. Quo simul consilio abducuntur à perniciosissimo otio.

G

Horum

Horum parvulorum cura potissima fuit *Venerab: P. Augustino*, quos tantâ solertiâ erudiebat, ut in Residentia S. JOSEPHI (quod in illa barbarie fanè mirandum) sanctissimo Missæ Sacrificio didicerint non solùm decenter servire, sed respondere etiam Sacrificanti, & quidem ex solo auditu, cùm plerique adhuc literas non noscerent; idque intrâ mensis unius spatium obtinuit; *Ven: Patre* laborem sic facilitante, ut quotidie illis lectionem per partes frangeret, & præorando memoriæ imprimeret. Qui verò jam legere addidicerant, & scribere, etiam ad Musicam applicabantur, sciuntque jam aliqui harphâ sive psalterio pro more Hispaniæ canere. Neque solùm sacrificantibus ministrant, sed insuper, ritu, quo utimur pro Missarum solenniis. Diviserat autem exercitationes pro captu singulorum, in horas singulas: prorsus ad illum modum, qui in Seminariis Europæis observatur. Nam Sacrificio Missæ quoti-

quotidie interfunt, ad quod ordinate procedunt prælato labaro, cantantes Hispano idiomate doctrinæ sacræ versus, & eodem ordine ab Ecclesia domum recedunt. Horâ post meridiem secundâ simul recitant coronam B. Virginis, sub vesperum Litanias, eodem ritu ad matutinas & vespertinas preces congregantur. Singulariter autem Innocentiæ & castis moribus invigilabat. Hinc vel remotè subodoratus olidi aliquid, in puero, quo pro aliorum servitiis utebatur, illico illum à contubernio amovit, nè vel ab afflatu scabiosæ ovis, grex tenellus vitium contraheret. Hæ parvulorum erant lucrandorum industriæ; nunc ad Apostolicas curas *Ven: P. Augustini* convertamur.



CAPUT XVIII.

*Residentia, quas administravit, & erexit
 Ven: P. Augustinus in Insulis S. JOANNIS,
 & S. ANNÆ, sive Rota.*

PAce jam Provinciæ reddita, Gubernator otium sumpsit lustrandi totam S. JOANNIS Insulam, ut consilium illud exequeretur, de contrahendo pagorum numero ad pauciores, sed frequentiores. A parte igitur Orientali transivit ad Septentrionalem Insulæ, in qua complures erant pagelli, quos omnes deduxit ad locum *Inapsan* dictum, amplum & patentem, situ ipso peramænum, lignis abundantem, & in medio terræ illius, cui jam assueverant, positum. Ad reliquas tamen commoditates, una deerat: descensus nimirum cymbis ad mare, quem ingressum ut illis aperiret, perfregit per suos milites magno labore, latentes sub aquis scopulos, quod prodigio simile visum indigenis. Hoc beneficio

neficio accumulati, quantocyus se congregârunt, prioribus domiciliis relictis, in unum pagum, divisum in duos vicos ad distantiam quartæ partis levæ, ut hac ipsa divisione major ipsis fieret commoditas, tum pro satis, tum pro piscationibus. Indè digressus Gubernator ad partem Australem Insulæ, ubi campus planissimus sub monte pridem habitato: hîc alteram Incolis habitationem descripsit, sanè percommodam, & priore non minùs amplam, qui etiam ex nomine suo *Pago* dictus est, & in sinu fluvium excipit, latè regionem illam inundantem, sic ut nihil ultrà usibus suis sive terrâ, sive mari desiderare possent Indi. Nec distabat *Agadnâ* ultra duas levcas.

In hos geminos pagos divisi Incolæ ultro se obtulerunt ad Residentias Patrum, & Ecclesias ædificandas. Quem laborem brevi tempore, quia magno fervore susceptum, absolverunt. Atque ità geminæ Ecclesiæ accesserunt, solidissimis fundamentis, quarum quæ-

libet trium erat navium, altera in *Inapsan Archangelo Michaeli & Militiæ Cælesti* sacra, altera in *Pago, Immaculatæ Conceptioni Deiparæ Virginis* dedicata. Conversus deinde Gubernator ad occidentem, ibi portum constituit, in quo deinceps jaciendæ erant anchoræ, ubi tertiam coloniam coëgit, constitutâ Ecclesiâ sub honore *S. Dionysii Areopagitæ*.

Ex his Residentiis prima *Ven: Patri Augustino* obtigit, excolenda in *Pago* sub honore *Immaculatæ Virginis*. Sed non diu hoc loco ei subsistere licuit, dum enim cresceret multitudo credentium, multiplicare etiam oportuit Residentias, & transferre Missionarios ad loca remotiora. Duabus solum levcis distabat *Pago* ab *Agadna*. Locus ad quem translatus fuit *Ven: Pater*, dissitus erat terrestri quidem itinere ad sex, maritimo verò ad decem levcas, linguâ barbarâ *Inarasan* dictus; ex quo tamen hoc solatium retulit, quòd non procul abierit extra amicitiam,

tiam, à *Matre Virgine*, ad *Sponsum Virginis*, quia Residentia illa *S. Josepho* consecrata fuit. Quia tamen Indi illi quò remotiores degunt à præsidio Hispanorum, eò minùs sunt tractabiles, majorem ibi invenit campum & agendi, & patiendi. Tractu tamen temporis, & consuetudine frequenti, affabilitas sancta *Venerabilis Patris* hoc novale Christi sic immutavit, ut faciem prorsus novam induerit. Inprimis renovavit connubia ad leges Matris Ecclesiæ, proscripto in perpetuum abusu barbaro, ut ubi libitum fuisset, inter se matrimonii nomine coirent, dum aliter liberet, rursus dissolverent. Hujusmodi malè cohabitantium paria centum sanctiore fœdere copulavit; sacro verò Baptisimi fonte 450. abluit. Quo successu in majores spes erecti Superiores, difficiliorem illi Provinciam offerunt in *Insula Rota*, sive *S. ANNÆ*, ad novam ibi formandam Christianitatem. Venit eò sub initium Januarij ad Residentiam *S. FRANCISCI BORGIE*

in pago *Sofa*, quem locum illi cesserat *P. Petrus Comanus* veteranus Missionarius, qui ad erigendam novam in eadem Insula Residentiam in pago *Agusan* discesserat; sed antequam hoc in opus redigere posset, avocatus fuit ad expeditionem, quam ducebat in *Gani* Insulas à Prætoře missus Capitaneus, atque ità solus in vastissima hac Insula perstitit *Ven: P. Augustinus*. Primùm quidem in *Residentia S. BORGIAE*, quæ in tres distributa colonias, domos numerabat centum nonaginta, animas verò Sacramentorum capaces ultra mille. In media harum coloniarum *Sofa* dicta residebat, disita utrinque à reliquis ad levcam Hispanicam, & singulæ coloniae protendebantur ultra levcam in longitudinem; via insuper erat saxis aspera, mari autem iter agere venti prohibebant; campum igitur habuit pro excursionibus Apostolicis ad levcas quatuor in hac una Residentia, in qua salutaribus Baptismi aquis ex adultis supra quingentos, parvulos omnes

omnes abluit, matrimonio verò junxit 170. paria. Transiens deinde ad fundandam in *Agusan*, novam Residentiam, hanc ex fundamentis erexit, & sub tectum deduxit, sive materiale spectes, sive spirituale ædificium, omni ex parte absolutum. *Atque ità per DEI gratiam*, scribebat ipse in Europam, *tota jam in DEUM credit, & S. JO ANNIS, & S. ANNÆ Insula. Benedictus DEUS!* Non omittam pium hoc loco dolum adscribere. Adverterat *Venerab: Pater* Insulanos istos à pauculis annis ità assuevisse tabaco fumatorio, ut hoc munere, quidquid optas ab ipsis impetres. Cùm tamen primis annis, dum conspicerent ex Europa venientes milites fumatorio tabaco uti, magos crederent, qui ignem spirarent ex ore & flamas sub lingua volverent. *Progressu autem temporis*, scribit ille, *hanc artem adeò bellè apprehenderunt, ut jam prodigia esse desierint, nec sit puer, aut etiam puellula, quæ etiam in defectu tabaci, quovis alio folio, uti pro fumo non noverit. Atque ità vitium*

tium hoc (si tamen vitium est, dempto abusu) ab Europæis in Marianos transit; singulari tamen DE I Providentiâ, cum in defectu alterius pecuniæ pro solo tabaco ab his Indis obtinere possis omnia. Æstimârunt primò ferrum, sed singulis annis tantâ copiâ allatum viluit. Non minùs etiam æstimabant vitrum, imprimis sonoras nolulas, ut sæpe pro una nolula gallinas (quæ ex Europa allatæ felici fecunditate multiplicantur) venderent quindecim. Sed & vitri pretium totum jam videtur transivisse in tabacum, sic ut Missionarii ipsi pro conciliando affectu populi hujus, non aliud ferè habeant illicium. Hinc & ego, utriusq; licèt tabaci hostis infensissimus, in gratiam Marianorum nolens volens, mecum circumferre, quaquaversum gradiar, tabacû cogor; ut quod aliàs dicere solebat celeberrimus ille in Americanis Indiis Operarius P. Cassini; non tantùm per aures fidem debere intrare Indis, sed etiam per os; ego insuper per nares intrare faciam. Tam lætis progressibus novus successit turbo, & ille decumanus.

CAPUT

CAPUT XIX.

*Nova persecutio ex insurrectione Insulæ
S. JOANNIS, incentore Judæ
Apostatæ.*

Mense Julio Anni 1684. *Josephus de Quiroga*, rebus anno superiore feliciter gestis, & divino Imperio subactis Insulis *Saypan*, *Tinian*, *Agiguan*, nova mandata accipit à summo Marianarum Prætorè D. Damiano de Esplana, ut remotiores ad Aquilonem Insulas, quas de *Gani* appellant, invitet, & inducat ad transmigrationem, ducendâsq; colonias in Insulam S. JOANNIS, soli benignitate humanis usibus longè faventiorè. Huc igitur expedit Capitaneum cum selecta 25. militum manu, quot sufficiebant in hanc expeditionem, adjuncto etiam *P. Petro Comano*, qui suavi verborum vi idipsum persuaderet. Octo erant Insulæ, quæ sub hoc nomine veniunt. Exscensione facta ex una ad alteram Insulam, ubi-

ubique cum pace , & finè resistantia cum suis exceptus est Capitaneus , si unam ex his *Ganensibus* Insulis excipias, cujus Incolæ præruptis suis, & inaccessis, uti credebant, scopulis præfisi, resistebant principio, ubi autem armis Hispanicis rem agi viderunt, ceciderunt animis, & quæ sponte admittere nolebant, coacti susceperunt imperia. Verbo, omnes hæ Insulæ se obsequentes exhibuerunt; Parentes quidem parvulos suos ad baptismalem gratiam ultro obtulerunt, se ipsos etiam prompto animo ad instructionem pro Fide, ad commutandas sedes, & ducendas colonias ad Insulam Metropolim S. JOANNIS.

Huic tam prospero rerum politicarum pariter, ac spiritualium progressui invidens infernus, DEO (cujus judicia semper justa sunt) sic permittente, novam, & omnibus annorum superiorum longè graviolem tempestatem excitavit, quæ non solum bene cœpta in novis Insulis, sed tot jam annis continuata

tinuata in S. JOANNIS, & S. ANNÆ,
 Religionis Catholicæ exercitia, ac
 spem propè omnem cum universali
 Christianitatis novellæ ruina, uno qua-
 si momento prostravit, & evertit. Cui
 tragoediæ, ut suus non deesset *Judas*
 proditor, in caput perduellium semet
 obtulit infamis Apostata, qui ex ipso
 baptismatis fonte hoc nomen suscepe-
 rat *Antonius Judas*. Homo iste, qui
 jam pridem sathanam in cor suum ad-
 miserat, cùm adverteret seniores ex
 pago suo *Apurguan*, minùs fortassis
 Evangelicæ disciplinæ patientes; ex-
 terni dominii intolerabile jugum, ve-
 lut vectem adhibet rei Christianæ pe-
 nitus evertendæ; quasi diceret: *Vos*
nescitis quidquam; expedit, ut pereant
pauculi, quàm ut tota gens nostra in inte-
ritum trahatur. An non videmus, in
 quam nos servitutem redegerint Hi-
 spani, dum à deliciis nostris abstractos,
 ad durissimos & quotidianos, in agris
 colendis & subigendis, nos condemnâ-
 runt labores, & sub lege pristinae liber-
 tati

tati prorsus opposita vitam miserrimam nos agere compulerunt. Ad hæc consilia, dum illi, quos reclamante conscientia sanctus Timor adhuc retinebat, velut attoniti subsistunt, reliqui, quos pecuina voluptas, & peccandi licentia stimulis agebat ferocibus, pronis auribus admiserunt, quod suadebat proditor ille facinus; & datis in conjurationem dexteris, ut rupto velut aggere, cædibus Innocentium omnem latè Provinciam inundarent, in societatem sceleris reliquos *Joanneæ* Insulæ pagos pertrahere, modis quàm possent secreta, sed simul ad terrorem propagandum efficacibus, concludunt: atque ità uno ore conclamant in necem exterorum omnium, & nominatim Patrum, & Evangelii tam invisi Prædicatorum.

Quia tamen horror ipse sceleris, tum etiam incertus exitus, certum autem supplicium, si alea extra votum caderet, furorem tantisper sistebat, moræ hujus impatiens Judas, jam in
omne

omne scelus abjectus : *Quid*, inquiebat, *cunctationi finem non facimus? si prodantur consilia, perimus. Jacta jam est alea, aut perdimus illos, aut ad nostrum interitum servamus. Retrò jam pedem referre, non est integrum. Quin exscindimus tandem, quam ex merito odimus Religionem? Quid mihi dabitis, & Prætorem manu mea tollam? Vos reliquos, sed cautè.*

Cùm sic in ducem facinoris se obtulisset Judas, & partem magis arduam, Prætoris scilicet interficiendi, ipse suscepisset, juberétque rem diu benèq; meditatam festinatò exequi, in sententiam tandem pertraxit conjuratos, qui dicuntur fuisse sexaginta. Erat autem sabbatum, quod 23. Julij antecede-
 bat, sub cujus crepusculum com-
 militonibus officia eâ lege, & ordine designat, ut alii quidem irruerent in milites, qui extra Castrum invenirentur; alii impetu Prætorianas vigilas obruerent; alii castrum ipsum diriperent; alii denique, Patres in Residencia, violenta morte è medio tollerent. Sic
 rebus

rebus pridie constitutis, Dominicam subsequenter facinori destinant; locum verò Orationis: quem conjurati clam subeunt, armati frameis, pugionibus, cultris majoribus, ac fustibus; arma tamen ita occultè gestant, ut nulli fidelium suspicionem moverint crudelitatis, die tam sancto exercendæ.

Aderat pro more Mifsarum Solenniis Prætor sinè comitatu, quia suū securus; quem finitō Divinō officiō *Judas* cum tribus lectissimis latronibus, dum ex Ecclesia egredi videt, sinè armis, sinè famulis, sinè omni custodia corporis, à tergo occupat cum sociis, multisque vulneribus confossum prosternunt, conculcant, perempturi penitus, nisi ejulatus innocentis pueruli evocasset Prætorianos milites, quorum duo pleno cursu contra perduelles effusi, arma armis opponunt, & alter quidem summo impetu hastam *Antonio Jude* in ilia impellit, alter framē dissectum per medium, cogit fædissimam animam cum visceribus effun-

funderere. Sic *Juda* perempto, & in locum suum missq, advolat & famulus Prætoris, pro Hero suo sollicitus, qui alterum ex Prædonibus interficit; simulque Prætorem vivum adhuc & spirantem internecioni subtrahit. Duo reliqui latrones in fugam versi, vel quòd ità crederent, vel ut scelerum sociis ad audenda reliqua, & finendam catastrophem etiam mendacio animos adderent, percurrentes magna celeritate Insulam, elata voce proclamant: Prætorem occisum, auderent porrò, & prosequerentur cædem, Patrum vel maximè.

C A P U T XX.

Impetus Conjuratorum in Residentiam Agadnensem, & Patrum cædes.

Cùm in proximo esset Festum S. P. CIGNATII, erant in hoc ipsum tempus ex aliis Residentiis convocati Missionarii pro 24. Julij *Agadnam*, velut ad sedem principalem, negotia spiritûs pro se, & commisso grege acturi

H

de

de communi consilio. Quorum aliqui jam congregati erant; alii sub meridiem, dum in æstu ipso esset primus barbarorum furor, alii sub vesperum, rabie jam concidente, advenerunt. In quo singularis enituit Divinæ Providentiæ cura, sic ordinans, nè sub uno ictu interiret tota Missio, ut servarentur aliqui pro novo semine, alii verò duram hanc terram sanguine suo irrigarent. Vox de percusso Prætoris Clasticum erat, ad dispergendum reliquum sinè Duce Christianum populum, sed imprimis, qui gregi invigilabant, Pastores Evangelicos. Qui igitur destinati erant, ut collectos in Residencia Patres obruerent, & foeda morte dederent, jam se insinuaverant in intima domûs, occupantes aditus omnes à porta, per scalas usque in superiorem ædificii partem, effusi per ambulacra, & impetum facturi in conclavia.

Non satis scio, quid negotii eo tempore habuerit cum Indis fidelibus Vice-Provincialis *R.P. Gerardus Bouvens*
ante

ante ostium fui conclavis, quem ocyùs
 impacto in latus prægrandi fuste, hu-
 mo affligunt, & duplici vulnere gravi-
 ter fauciant; pro quo tamen animam
 suam ponens frater Laicus, in cuneum
 latronum infilit, seminecem in came-
 ram retrahit, & clauso ostiò vivum ad-
 huc furentibus eripit. Ad quem tu-
 multum ex cubili suo cordatè prosi-
 liens *Ven: P. Emmanuel de Solorzano*, qui
 Officium & Regimen Patri *Gerardo* nu-
 per cesserat, pro eodem etiam vitam
 gloriosa morte commutavit. Erat
 pridem in odio, quia Viri Sanctitas vel
 ad videndum gravis erat sceleratissimis
 parricidis; hunc igitur cultris, pugio-
 nibus, sudibus, eum in modum con-
 cidunt & conterunt, ut pretiosam ani-
 mam illa adhuc nocte pro concredito
 sibi grege Pastori omnium redderet,
 adeò bene de illa Missione meritis, ut
 secundus illius à *P. Ludovico de S. Victore*
Fundator audiret. Post hunc *P. Jacobus*
Zarzosa fuste in caput percussus, simul
 tamen è prædonum manibus elapsus,

ad excipiendam Prætoris, uti credebatur, animam agentis, Confessionem accurrit. Alii Sacrilegi *Balthasarem Dubois* Laicum Religiosum comminutô craniô, & effusô cum sanguine cerebrô, nè effugere posset, terræ allidunt, repetitisque ictibus obtruncant.

Neque mitiùs egêre cum altero Laico *Petro Baron*, quem plurimis & in capite, & in scapulis, ac reliquo corpore, punctim, cæsîmque datis vulneribus dilaniârunt; hunc tamen superstitem voluit DEUS. Et verò contra spem convaluit. Supererat vir DEO charus ex Philippinis ortus, Religioni nostræ adjunctus, ex illorum nimirum classe, quos Hispani *Donatos* vocant, anima mansuetissima, & in optimo senio; hunc dirè concisum ad Societatem supernam in suo sanguine triumphantem transmiserunt. Dúmque isti sic furori suo litant, in cæde personarum DEO Sacrarum; alii, quos extra Castrum in viis publicis, privatorum ædibus, ipsa Ecclesia, Hispa-

Hispanos milites reperiunt, cædunt & mactant; ipsas ad Castrum Vigiliæ, dum incautiùs agunt, aggressi, geminos ex præfidiariis interimunt.

In hac rerum perturbatione Sanctissimum Missæ Sacrificium persolvebat in Ecclesia *P. Antonius Cerezo*, aliàs *Kersbaumer*, natione Germanus, & ex Provincia Baviariæ, in Societate *Ven. P. Augustini* ad hanc Missionem submissus. Hic quamvis de Rebellium furore, & domestica cæde monitus, reverentiâ tamen Sacrificii illud aberrumpere noluit, sed fortior omni metu, & dignâ quovis Heroë constantiâ, stetit ad aram, usque ad finem Liturgiæ; & insuper militi Sanctissimum Christi Corpus petenti, cum eadem animi præsentia devotissimè porrexit. Interim milites, quos in compitis, velut efferati canes insequiebantur parricidæ, ad Ecclesiam, Sacrum Asylum, confugientes, cuneum sceleratorum post se in Ædem sacram traxerunt. Contra quos *P. Antonius* ab ara con-

versus, manu Sanctissimum CHRISTI
Corpus tenens, ad templi medium pro-
cessit obvius. Quo facto adeò perter-
ruit barbaros, ut in fugam se dederint,
relictis indemnibus & Patre & Fide-
libus, qui ad hoc asylum confugerant.
Quæ res sanè aliquid supra naturam
habuit, vel ex eo maximè, quia his
dilapsis succedebant alii, necem inno-
centum adhuc spirantes, & eodem in
Ecclesiam impetu irruentes, quos pari
constantia animi, & eventu, prælato
contra turmam barbaram eodem San-
ctissimo Sacramento, tanto terrore oc-
cupavit, ut steterint attoniti, veluti si
ex marmore essent statuæ, sic ut nihil
penitus indignum à barbaris, vel in se,
vel in adhærentibus sibi passus sit. *Lau-
detur Deus, & Sanctissimum Sacramentum.*

CAPUT XXI.

*Propagatur Rebellium rabies in alias
Insulas ad Patrum reliquorum necem.*

HIs in Agadna sacrilegè gestis, di-
lapsi impii, ut vires recolligerent,
DEO

DEO in solatium suorum sic dispo-
nente, spatium concefferunt tum
militibus, tum Patribus, qui adhuc
superstites erant, se ad Castrum reci-
piendi, & si fortè majore numero per-
duelles redirent, junctis viribus offen-
siva arma in defensionem expediendi.
Cum ecce Vigiles novo terrore com-
plent omnia. Ingens Indorum turma
adventare nunciatur. Trepidatum est
ad hoc nuncium, usq; dum agnovis-
sent, ductorem hujus Turmæ Indum
esse, ex paucis fidelem, & probatæ sem-
per fidei *Ignatium Inetti*, Virum inter
suos strenuum, & magna fortitudinis
laude celebrem, qui in defensionem
periclitantium cum suis advolavit, &
confestim se Prætori, infortunio Chri-
stianitatis illacrymans, obtulit. Con-
jurati interim totâ Insulâ dispersi, faci-
nus suum evulgabant, sollicitando pa-
gos omnes ad generalem insurrectio-
nem, strenuè mentientes, occisos
jam, & deletos in *Agadna* præsidia-
rios ad unum omnes, cum Prætor &

Patribus. Missis etiam nuntiis ad Insulas *Rotam, Tinian, Saypan, & Gani*. Quo mendacio plurimum spei ultimæ obfuerunt: quia & illis, qui in omne scelus abjecti erant, addebantur animi, & fideles adhuc, desperata ab Hispano præsidio protectione, in desperationem præcipites ibant.

Serpsit igitur quàm latissimè flamma, quæ primùm *Apurguanos*, deinceps *Retigianos* eodem furore succendit. Nam ex primariis pagi illius, unus, qui rebus in *Agadna* gestis otiosus non adfuerat, eadem adhuc die ad suos reversus, confirmavit mendacium, de Prætorio cum Christianitate omni, eo loco, exciso; effecitque, ut S. Evangelii apud illos Ministrum, *P. Theophilum de Angelis*, natione Italum, clari sanguinis, Juvenes duo projectæ audaciæ adorirentur, & *Angelicum Patrem* domo protractum, illa adhuc nocte in cymbam raptarent, ex malo suspenderent, suffocatique corpus in altum mare abjicerent. Neque alia fors manebat
per

per reliquas Provinciæ oras distribu-
tos Patres, nisi parendi promptitudo
eos manibus Rebellium eripuisset. In-
dicto enim in *Agadna* conventu pro
24. Julij *P. Thomas Cardenoso* sub meri-
diem advenit, ad noctem *P. Basilus*
Roulx. *Pagenses* verò suos sub specie
securitatis, veriùs in certam necem,
cùm jam scelus in cor admisissent, ser-
vabant; sed potior illis obsequendi
religio, hoc periculo exemit *P. Joan-*
nem de Ehumada & *P. Joannem Tilpe*.

His jam in tuto collocatis, anxia
adhuc cura tenebat omnes, de Sociis
reliquis, nimirum de *Ven: P. Augustino*
Strobach, *P. Carolo de Boranga*, *P. Mathia*
Cuculino. Et *Ven: P. Augustini* quidem
gloriosum exitum pro Epilogo histo-
riæ hujus servo; *P. Carolus* verò *Boranga*
ex Provincia Austriaca, multarum
palmarum Vir, incertus consilii, cùm
ex una parte infesta jam essent, & à la-
tronibus obsessa itinera, mendax fama
Agadnæ everfa omnia contestaretur;
ex altera verò Parochiani in eam ho-
ram

ram adhuc fideles, multis illum precibus, & ex animo vero rogarent, nè vitam suam in manifestum discrimen conjiceret, semetipsos, & corpora sua in tutelam Patris offerentes, illis se credidit & permisit. Et perstiterunt fideles in promissis per tempus aliquod, quousque tandem & ipsi in congenitam barbariem relapsi, Patrem animarum suarum, foedifragi crudeliter fustibus contrucidârunt.

Verfabatur sub id tempus *Josephus de Quiroga* in *Saypan* cum *P. Mathia Cuculino*, qui salutem Insulæ illius curabat. Castrum ibi alterum in præsidium erexerant Hispani. Capitaneus ex *Gani* Insulis cum cohorte sua nondum redierat, quos dum Prætor de conjuratione vult certos, tabellarius Indus fidem fallit, & ultra *Rotam* Insulam non progreditur. Rebelles verò antequam hæc subsidia sic dispersa in unum corpus reduci possent, tempore usi, in *Agadnam* reversi sunt, concrematuri Ecclesiam cum Residentia & Collegio Juven-

Juventutis Insulanæ. Quorum conatibus fortissimè, & per longum tempus, dum præsidarii paucitate ipsa prohibentur ex præsidio prodire in campum, restitit in fide & robore Invictissimus *Ignatius Inetti* cum suis, quousque tandem & ipse multitudine propè obrutus, sub armorum præsidii tutelam se recipere est coactus.

Atque ità 27. Julij Templum & reliqua in *Agadna* ædificia *Orientem* versùs, vorax flamma absumpsit. Quæ flamma præluxit gloriosissimo agoni *Ven. Patris Augustini*, uti mox dicetur. Hostis barbarus etiam hoc successu elatior, cùm jam in potestatem redigisset totam *S. Joannis* Insulam, solâ *Sinahanâ* (quæ *Ignatii Inetti* est patria, ultimum Christianitatis nomen in hac Insula) in fide, DEO, Regi, & Prædicatoribus Evangelii data, persistente, ultimas vires convertere statuit ad expugnandum Prætorianum Castellum aut vi, aut dolo.

CAPUT XXII.

Generalis totius Insulae Joanneae insurrectio contra Castrum Prætorianum in Agadna.

Cùm jam totius Insulae pagi sub signis convenissent, immensam multitudinem præsidio admovent, illud 19. Augusti arctissimè cingunt, & ferociter impugnant. In quo congressu jam tertium se probavit fides & fortitudo *Ignatii Inetti*. Primùm enim Hispanorum armis ex castro adjutus, foris ipse, & extra muros, cum suis stans, & strenuè dimicans, impetum hostium sustinuit, & fregit. Quamvis enim fundibularii & lancearii ingentem faxorum & telorum vim, velut nubem, in eum effunderent, stetit tamen intrepidus: quoad tandem ex majoribus Hispanorum machinis, sclopisque notabili clade ac strage suorum perterriti barbari, in fugam vertentur; quos ille longo intervallo insecutus, cecidit à tergo, nè uno quidem

dem è suis, singulari DEI Omnipotentis protectione, aut desiderato, aut etiam leviter faucio. Non multi intercurrerunt dies, cùm redeunt latrones, majore adhuc numero bellum instauraturi. Sed immisit de Cœlo DEUS imbres, quibus præpediti, vim nullam facere poterant.

Igitur ad dolos conversi, quia aperta vi contra muros propugnaculi, fundis & lanceis prævalere non poterant, tentant strategemate rem peragere. Et primùm quidem Legatos expediunt ad *Ignatium Inetti*, qui promissis amplissimis animum ejus, si possent, in suas partes flecterent. Si non proficerent, minis exterminationis eum frangerent. Sed is de interitu Religionis Sanctæ magis sollicitus, cum exprobratione perjurii & sacrilegii, impiissima postulata rejecit, jam securus de protectione Divina. Sic repulsi, ex propinquo magis dolos exequi conantur. Sciebant Hispanis Præfidiariis immixtos Philippinos non paucos;
 hos

hos velut finitimos & populares, & cum quibus mutua haberent conjugia, in vota sua faciliùs pertrahi posse credebant, non omnino in vanum; utpote durissimi laboris jam pertæsos, & eventûs incertos. Aggressi sunt autem pertentare animos illorum per mulieres, & initium fecerunt à capite sive Officiali cohortis Philippinæ, ad quem destinant aniculam, cujus filiam habebat pro conjuge, ex pago *Apurguan*, viro nomen *Franciscus Masongsonus*. Huic capita Legationis suæ exponit, nimirum: perfvaderet animosè & cordatè fociis suæ cohortis, ut desertis exteris, & occiso Prætore, se ipsos in libertatem vindicent; si viribus diffidant, nec prævalere possent contra Hispanos, saltèm salutare fuga se ad tutiora recipiant, & hoc robore enervent præsidium, reportaturi omnem à popularibus gratiam, amicitiam, & bonorum communicationem. Sed alia *Francisco* mens erat; cohorrui ille ad flagitium, & mox

Præ-

Prætori postulata impia recensuit, rogans insuper majorem suâ curam admitteret, duplicaretque Corporis custodiam. Hæc consilia Prætor communicat cum Patribus, quibus jam solis summa pericula concredi posse cognoscebat. Siquidem prudens erat metus, nè milites animis fracti, vel in desperationem abirent, vel ad hostem turpi fuga se reciperent; cùm jam ante biduum quinque ex Philippina cohorte per murum delapsi, ad perduelles secessissent; alios similia meditari, non obscuris rumoribus intellexerat, & quorundam in verbis licentia prodebat, quale in pectore lateret venenum. Rebus sic in arcto positis, Patres laudabili exemplo, ut Prætori omnem præstarent securitatem, arma induunt, & per se ipsos excubias ad Prætoris domum præstant.

Atque ità, etiam hæc iniqua consilia effectu caruerunt; necdum tamen nocendi voluntas à proposito destitit. Fame expugnari posse præsidium certum

tum habebant: hanc viam ineunt, & vias omnes, quibus necessaria ad vitum invehì possent, præmuniunt. Unicus illis metus obsistebat, nè copiae, quæ ex Insulis *Gani* necdum redierant, tum vel maximè Heros insuperabilis *Josephus de Quiroga*, flagellum perduellium, qui in *Saypan* Insula remanserat, laboranti *Agadnæ* in subsidium venirent. Mittunt igitur ad Insulas illas, de corpore suo, quos habebant incensores pessimos, ut & ibi (jam enim eò propagata fuerat seditio) bellum urgeant, perdantque quibus possent modis Hispanos, neque transitum permittant.

Hic in abyssum intro judiciorum DEI; Cujus Altissima Sapiencia in hoc afflictissimo Christianitatis *Mariannæ* statu, & *Josephum Quiroga* in *Saypan* tot voluit casibus exerceri, ut auxilio esse non posset; & Capitaneum cum suis ad Insulas de *Gani* cladem pati longè tristissimam. Redibat ille comite *Patre Petro Comano*, cum 25. militibus

in

in *Saypan* ad *Josephum Quiroga* sub finem
Septembris, adhuc ignarus Rebellio-
nis. Distributi erant focii in plures navi-
culas, milites rerum securi, nautæ verò
conspiraverant, ut signo dato, vecto-
res suū incurios in mare præcipitent.
Exiguo spatio à terra abiverant, &
mox ex condicito, incipientes à Capi-
taneo cohortis, nautæ singuli suos,
quos vehebant milites in mare abji-
ciunt. Ex quibus pleriq; aquis submersi
interierunt, pauculi superato periculo
in litus evaserunt. Pater verò *Petrus*
Comanus suū memor, & confortatus
ab alto, nautam suum tanta vi verbo-
rum à prodicione retinuit, ut illum
coëgerit litus repetere, & innoxium
exponere. Ubi adhuc 23. Novembris
ipsum vivere, & visum à se retulit *An-*
tonius Agihi Indus ex paucis fidelis.
Quidquid tamen agerent *Agadnenses*
focii, viam nullam inire poterant, ut
P. Petrum in securiora deportarent.

Nuncio hujus cladis sic consternati
fuere *Agadnenses* præfidiarii, ut propè
I abfuerit,

abfuerit, nè cum animis & arma abjicerent, nisi in spem erecti fuissent Apostolicis adhortationibus Patrum, monentium DEI Altissimi Æternam gloriam, Regi Catholico juratam fidem, Nominis Hispani decus, ultimum in illis Oris Christianæ rei ac sanctæ Fidei periculum, suam denique salutem sempiternam vita hac mortali & temporanea potiozem haberent. Spondere se invictum DEIPARÆ Virginis præsidium, tum Archangeli Michaëlis, Præcursoris Domini, ac Coeliturum reliquorum, quorum tutelæ, ac Patrocinio patriam illam commisissent, parata auxilia. Quæ in hanc diem experti essent de Cœlo beneficia, in argumentum admitterent adfuturæ, etiam in præsens, Divinæ opis. Neque enim defuturam pietatem Divinam, causam suam fortiter agentibus. Quæ tanto spiritu dicebantur, ut oracula credi potuerint ex eventu.

CAPUT XXIII.

*In Saypan Insula fortissimè impugnant
Joseph de Quiroga præsidium, sed
tandem frangitur tempestas.*

PRemi potest, non opprimi Petri
navicula. Sanguine fundata est
Ecclesia, sanguine crevit, sanguine
proficiet, sanguine finis erit. Ejus-
modi fuerunt ubivis terrarum Eccle-
siæ sanctæ primordia. Ut semper læti
successus tristioribus miscerentur. Hie-
rosolymis nata natalibus adeò felici-
bus, ut totus populus, imò Mundus
totus putaretur abiturus post Chri-
stum; & mox ad unius Judæ prodito-
rium osculum tanta subsēcuta est
odiorum tempestas, quæ non aliter,
quàm excidio, & communi gentis il-
lius ruinâ componi potuit. Ecclesia
nihilominus ex hac tempestate, caput
erexit serenius: & crevit in lucem tan-
tam, ut jam à fulgore ejus Roma gen-
tium Domina illuminaretur; prius ta-
men in Capitolio figere non potuit

Crucis vexillum, quàm catacumbas,
 & Romam subterraneam impleviffet
 Martyrum Sanctorum ofsibus. Non
 alios Natales habuit in Japonia, in va-
 ftiffimo Sinarum Regno, & nè procul
 abeam, etiam in cultiffimis nati-
 onibus, ubi jam dominatum fufceperat
 Fides fancta, ut folium fuum firmaret,
 perfecutionibus perduellium concuti
 debuit; taceo Gallias & Angliam:
 Boemia ipfa pro exemplo fit, & Apo-
 ftolicum Ungariæ Regnum, quantas
 non viciffitudines fubire oportuit, ut
 in hanc efflorefceret gratiam, quâ ex
 parte jam fruimur, fpe etiam majoris
 nos confortamus. Denique quæ ad
 ictum mallei elaborantur, durabilia
 funt, & ætatem ferunt. Hæc ipfa fuit
 de Marianis Infulis benigniffima DEI
 Providentia. Ad hiftoriam redeo.

Josephus de Quiroga, qui hanc Pro-
 vinciam fufceperat, ut ficut in Infula
 S. JOANNIS fecerat, pariter & hanc
 gentem ex Infulis & locis minùs cultis,
 ad faciliorem transferret glebam, & in
 pau-

pauciores, populosiores tamen pagos distribuere, ad formandam Christi tandem nomine dignam Rempublicam, sedem fixerat in *Saypan* Insula, ubi & castrum tumultuario opere erexerat, jamque naves expediverat in *Tinian* Insulam pro transvehendis coloniis. Quæ tamen sancta consilia evertit propagata rebellio ad *Tinianenses* primum; & per hos ad *Saypenses* ipsos, latè evulgato mendacio de exterminio universali rei Christianæ in *Agadna*. Et *Tinianenses* quidem palàm se publicârunt criminum focios, occidendo cum militibus nautas, viros 17. & naves confringendo, ut neque subsidium sperare possent, neque ad tutiora se recipere, qui in utraq; Insula supererant Hispani.

Saypenses verò, cùm sperarent numero facilè opprimi posse paucitatem, insurgunt simul omnes. Priùs tamen experiri voluerunt, quid dolus posset. Veniunt ergo magno numero ad castrum non vocati, petentes accommo-

dari sibi secures pro excindenda syl-
 va, quæ in proximo stabat. Ex his
 aliqui se comiter in familiaritatem præ-
 sidiariorum insinuant, & munusculis
 etiam pertentant militum animos,
 septum ipsum ex palis constructum,
 incuriis custodibus jam ingressi. Ut
 ad hoc advertit *Josephus de Quiroga*,
 quod erat suspicatus, milites de igna-
 via castigatos ad arma evocat. Qua
 voce perterriti diffugiunt malè conscii
 ad socios, qui in infidiis expectabant,
 ut milites, quos ad operas elcuiissent,
 obruerent, præsidium demum ipsum,
 milite spoliatum diriperent. Sed hoc
 dolo sic eluso, aliam stropham in-
 choant. Mandaverat ante dies pau-
 culos Præfectus, seditionis adhuc igna-
 rus, Incolis ex pago *Opian*, se transfer-
 rent ad locum præsidio viciniorem.
 Veniunt igitur primores pagi, peten-
 tes locum novæ habitationi assignari.
 Hanc designationem faciebat Præfe-
 ctus ipse, qui tamen jam suspitione
 præoccupatus malæ fidei, pedem non
 extulit

extulit; sed militem ex gregariis substituit, qui operas dirigat; quod dum aggreditur, fustem illi rebellium unus tanto impetu in caput impingit, ut mortuus conciderit miles. Tres alios insuper præsidarios, quos extra castrum invenerant, pari crudelitate interimunt. Hæc signa sufficiebant *Josepho*, ut intelligeret, quàm procul flamma ascendisset. Domi igitur in defensionem arma parat: ut tamen certiùs cognosceret, quo loco foris res esset, octavâ Augusti in campum egreditur, non alio, quàm decem militum manipulo, in expeditionem accinctus. Cùm ecce, ex improvviso obruitur à quadringentis barbaris, qui illum fortissimè aggressi, lanceis, lapidibusque fulminabant. Sustinuit tamen intrepidus & fregit secundum, ac tertium impetum barbarè vociferantium. At quia novæ semper ex latebris & navibus (nam ad litus pugnabatur) accessiones fiebant, nè decas militum tandem à multitudine

obrueretur, receptui cecinit, suosque bono ordine salvos & illæsos, post trium horarum conflictum ad castrum reduxit, nè uno quidem velle viter fauciato. Sauciatus autem fuit ipse in animo suo gravissimè, quando certis jam nunciis intellexit, quæ in *Agadna*, quæ in *Tinian*, quæ in *Ganià* perduellibus patrata erant, navibus insuper, nè quæ spes evadendi superesset, ereptis. Et hoc in extremo mundi angulo, quem nullus amicorum prætervehitur, sinè proprio navigio, quo vel ad denunciandum sociis extremum periculum utiliceret, sinè pulveris pyrii, & aliorum in bellum, si protrahatur, necessariorum suffecturo apparatu, cum triginta quinque solum militibus, quorum pars major continuis vigiliis, laboribus, & infirmitatibus fracta, armis tractandis amplius haud foret idonea, contra tantam hostium indies accrescentium multitudinem, suapte naturâ, nunc autem ex fuso jam tanto fidelium sanguine

ne longè magis ferocium. Neque ta-
 men his omnibus malis frangi potuit,
 quem mens altior regebat. Sed ut
 milites metu propè exanimatos ad
 eandem animi fortitudinem erigeret,
 tum per se, tum per præconem Evan-
 gelii, quem ad latus habebat, rationi-
 bus magis Divinis, quàm humanis ad-
 hortari cæpit. Erat is *P. Mathias Cu-*
culinus, & ipse ex Boëmia Apostolus,
 qui in medium militum profiliens,
 hanc ad illos orationem habuit: spem
 omnem in DEO positam, ceu loco
 securissimo, scirent; cui æquè facile
 sit in paucis, ac multis, infirmis, ac
 robustis vincere. DEI nimirum, &
 sanctæ Fidei causam agi. Se quod at-
 tinet, velut pignus adfuturi de Cœlo
 subsidii tenere, quòd tales nactus sit
 commilitones, qui tot præclaras de
 perduellibus victorias jam tulerint.
 Neque enim in terras has venisse, ut
 corruptibile aurum, sed pretiosas ani-
 mas quærent, non ut rem familia-
 rem, sed DEI unius gloriam amplia-
 rent,

rent, non principatum terrenum, sed Regnum Christi in Barbarorum animis stabilirent. Id unum porro providerent, nè ipsi paratis de Cœlo subsidiis obstacula opponerent, quin potius ad favores Cœlestes condignè se præpararent frequenti expiatione conscientiæ, & imprimis *Pane Fortium*. His adhortationibus Spiritûs sancti gratia efficaciam addidit, in tantum enim corroborati fuerunt animis, ut metu jam penitus excusso, ultro à Præfecto milites peterent, educi in campum, & copiam sibi conflictûs fieri. Indulta tamen fuit adhuc mora, ut exercitatione frequenti piorum operum, magis incalescerent, cùm pietas ad omnia sit utilis. Proscriptâ igitur temere jurantium consuetudine, & omni morum licentiâ, frequenter admodum iterabant divinissima Sacramenta, aliâque Religionis exercitia tanto fervore accumulabant, ut moderatione egerent, sanctèque affirmaret Pater, sibi magis Religiosorum cætum

cætum, quàm militum præsidium vi-
sam esse *Saypensẽ cohortem*. Ad hæc
prius quàm in hostem educerentur,
præter Virginem finè labe conceptam,
geminos elegerunt expeditionis Du-
ces, *Michaëlem Archangelũ, & S. Josephum*,
neque ab ea die unquam egressi sunt
contra Barbaros prius, quàm simul de
genibus invocassent eorum auxilium.
Et sanè D. JOSEPHI manifestam sæ-
pius opem sunt experti, nam ipsâ illâ
die, quâ, Sacerdotis hortatu, hunc in
Patronum elegerunt, pars una cohör-
tis, multitudine Barbarorum con-
clusa, illis omni parte fugatis, salva &
innoxia stetit. Eidem geminas alias
de cæsis perduellibus memorabiles
victorias adscribunt. Eidem denique
in gratis referunt, quòd Barbari, dum
ultimas vires collegissent, & pleno im-
petu irruerent in castrum, repentè
castris suis desertis obsidionem solve-
rint, & pavore panico percussi, totâ
propè Insulâ excefferint. Illud autem
præcipuum fuit, quòd Præfectus &
Milites

Milites uno ore, & si opus foret jurato testimonio, affirmabant, vice quadam, cum fervor pugnae ipsos in confertissimos hostium cuneos abduxisset sic, ut ex omni latere per circuitum jaculis Barbarorum impeterentur, nihil tamen damni in illo aestu certaminis acceperint, quin oculis suis viderint tela hostium in aëre arcanâ vi confringi, & confracta comminutâque ante pedes suos concidere. Coelo sic favente, jam aliqua allucebat serenitas, necdum tamen ex integro.

C A P U T XXIV.

Multis cladibus attriti perduelles in Sappan, reddunt suam Insula quietem, & Josephus Quiroga in Agadnam revertitur.

ANtequam perduelles ope Sancti JOSEPHI ex Insula ejicerentur, reliquis pacem & veniam petentibus, magno periculo res acta fuit. Ad quod paucitas praesidiariorum, hostium multitudo juvit plurimum. Quam.

Quamvis enim Hydræ huic non pauca capita decuterentur, auctior tamen pluribus, redibat identidem in campum. Sic 16. Augusti tres Insulæ *Saypan, Tinian, & Agiguan*, aliquibus etiam ex *Insula S. JOANNIS* accurrentibus, unitis simul viribus, septum præsidii, divisis in omnem partem copiis, ad Aquilonem, & Austrum (nam ab oriente paludibus, ab occidente mari continebantur) furore maximo, & clamore incondito aggressi sunt. Oppugnationi initium dedere fundibularii, injectâ intrâ septum ingenti lapidum copiâ, velut imbre densissimo, post quem generali assultu perrumpere aditum iteratis vicibus tentârunt, semper autem cum clade rejecti sunt: machinis minoribus, & fistulis æneis, sed inprimis militum constantiâ ac robore, DEO illos protegente. In sex horas sustinere oportuit hunc assultum, quousque barbari fracti animis, in fugam verterentur. Redierunt tamen secundò, redierunt & tertio,

tiò , majori semper cum apparatu , majoribus viribus , majore ferocia , sed DEO pro suis pugnante , cæsi semper & attriti , in latebras se receperunt , nullo præfidiariorum damno. Quâ tamen perduellium inquietâ audaciâ irritatus Præfectus , excursionibus illos antequam vires colligere possent , atterere , & coërcere constituit. Relictis igitur ad septi tutelam infirmioribus , cum validiore manu in castra Rebellium leonis instar irruit , diripit , & cæde promiscuâ fugat. Erant castra illorum præmunita fossis & innumeris ossium , & lignorum acutissimorum hastulis , divisa in varias classes , in singulis per trecentos & quadringentos , fundis & lanceis armati stabant. In hos Præfectus impetum faciebat cum suis 12. subinde 15. nunquam ultra 18. sed lectissimis viris , tanta strage barbarorum , ut confusis ordinibus se abjicerent in præcipitem fugam. Quos ille infecutus succensis eorum pagis & seggetibus , ad propagandum terrorem ex fuga

fuga retrahebat, fundebat, captis plurimis, pluribúsque ultimo supplicio delictis. Donec fatigati, fractique, pars in *Tinian* Insulam, pars in prærupta *Saypensis* se reciperet, pars tertio à rebellionē mense supplex facta, pacem & delicti veniam postulare. Victis, suppressisque rebellibus, unum ex captivis, mortem ejus amicis minitatus, si fidem falleret, cum epistola ablegat in *Agadnam* ad Prætorem Præfectus, à quo tandem responsum obtinuit, ut relictis omnibus impedimentis in *Saypan*, auxilio veniret prætoriano præsidio, idque omni quâ posset celeritate. Non erat navigium proprium pro transitu, alienas cymbas adhibere prohibebat recentissimi casus memoria, quo perduelles nautæ Capitaneum cum suis ad Insulas *Gani* in mare abjecerant. Secretissimo insuper opus erat consilio, nè si meditatum iter innotesceret Indis, spe proximæ libertatis novum scelus attentarent. Simulandum igitur ratus, spargit in vulgus, in *Tinian* Insulam

Insulam se abire, ut ibi in belli authores advertat. Cymbas igitur ad transfretandum à pagi *Opian* incolis expectiit, sed cum festinatione, nè abitus vulgaretur, & qui ad latebras confugerant perduelles, in exitium suum excurrerent. Offerunt cymbas suas promptissimè *Opianenses*, sive quòd sperarent intercludendum deinceps Hispanis reditum, sive quòd crederent, etiam Præfectum hunc cum copiis suis, eâdem operâ, quâ ad *Gani* in Oceanum effundi posse: nec deerant, qui hujus conjurationis præmonerent ex ipsis Indis fidelibus. Verùm, Præfectum neque manifestum hoc periculum, neque maris eo tempore ad navigandum minimè idonei paria discrimina, neque numerosa hostium classis, quæ mare ad illum perdendum oberrabat, justissimus metus, à proposito exequendi Prætoris mandatum deterruit.

Rebus igitur, prout patiebantur, sic ordinatis, ut spem faceret proximi
reditus

reditus cum majoribus etiam viribus,
& victricibus armis, nautas ita funibus
implicat, ut potestatem quidem reti-
nerent regendae navis, nullam tamen
proditionem moliri possent. Sic in
octo cymbas distributis sociis, portu
exit 21. Novembris. Verum (O! ite-
rum Judiciorum DEI abyssum!)
dum Insulae *Tinian* adnavigant, tantos
aestu maris (qui eo in loco ingens est)
concitatos reperere fluctus, ut omnes
manifestum interitus periculum adie-
rint. Et tres quidem cymbae cum 15.
militibus, qui contra Praefecti man-
datum nimium terrae propinquarunt,
naufragium fecerunt, nequicquam
aliis cymbis auxilium ferre laboranti-
bus, nisi eodem naufragio involvi vel-
lent. Cognitum tamen postmodum
est, eos naufragos undis ereptos, par-
tim in *Tinian*, partim in *Saypan* detine-
ri. Residuae quinque cymbae supera-
tis procellis, & maris fluctibus, insoli-
tum furentibus, elusis praedonum in-
sidiis, & frementibus hostibus in

Agadnam salvæ 23. Novembris appulê-
re. Hunc in portum ingressum *Jose-*
phus de Quiroga cum 20. militibus, &
Sacerdote nostro, animabus in purga-
torio detentis debent, quibus *Agad-*
nenses Patres magnum Sacrificiorum
numerum & Prætor quingentos Im-
periales, in sacra alibi legenda devo-
verat. Mox autem, ut inquieti per-
duelles in Insulas *S. Joannis* reditum
Josephi Herois cognoverunt, tantus
reas conscientias pervasit pavor, ut
desertis pagis plurimi ad remotiores
Insulas diffugerint: Mediterranei au-
tem in sylvarum & montium latebras.
A quo tempore, à Decembri scilicet
1684. usque ad Majum 1685. non pau-
cæ excursiones ad reddendam pacem
pristinam huic Insulæ, institutæ sunt,
optato semper eventu, nullo un-
quam ex Christianis militibus
desiderato.



CAPUT XXV.

*Certamen gravissimum Ven: P. Augustini
in hoc Insularum Marianarum statu.*

Nunc verò, ut in illo concludam,
cujus gratiâ totam hanc historiam
dedi, ad ultimum agonem *Ven: Patris
Augustini* propero. Dabunt felicio-
res calami etiam reliquorum Virorum
Apostolicorum, quos eadem pro Chri-
sto moriendi felicitas verè fecit esse
Germanos, condigna meritis Elogia;
mihi quia particulares notitiæ de-
erant, non licuit esse tam felici. In
lucro referam, si exemplo ad scriben-
dum provocavero; & provinciæ, cui
me totum debeo, vel in hoc uno Viro
gratum præstitisse obsequium intelle-
xero. Vocatus in *Agadnam* pro 24.
Julii, ut erat ad omnē Superiorum nu-
tum accinctus, nihil sanctius habuit,
quàm ut statuta die eò se conferret;
sed quidquid ageret, ex loco movere se
non potuit, semper ab intemperie
maris rejectus. **DE** hoc consilium

fuit, qui sic omnia in gloriam servi sui disposuit. Tandem propitium nactus ventum, *Agadnam* properat. Dies erat 27. Julii. Nocte diem hanc antecedente (prout superius retuli) alterum in præsidium *Agadnense* impetum fecerant primi furoris complices, ut, cum loco potiri non possent, everterent quæ extra castrum erant, Religionis sacræ (cujus odio furebant) trophæa, Ecclesiam nimirum, Residentiam Missionariorum, & Juventutis, ac primæ Innocentiæ seminarium.

Hæc omnia illo adhuc vespere manu sacrilegâ in flammâs dederant, cum primo manè ex *Rota* Insula advehitur *Ven: P. Augustinus*, jamque portum salutaturus, cum ab oratione oculos elevat, videt miserabile bustum, & ex ruderibus adhuc fumantibus in altum ejectas scintillas, & in mari velut speculo, rei peractæ totam seriem. Hæc tædâ phosphorus illi fuit lucis melioris. Intelligebat nimirum, quò à DEO vocaretur, & quantulo intervallo distaret à
portu

portu tot votis expetitæ felicitatis : si portum *Agadnensem* subiret , compos futurus. Si etiam moras traheret in mari , jam occupatores Insulæ sibi designâsse non involuntariam victimam. Quin igitur potius ageret , quod agendum erat. Sed quid illud ? ut se ultro-
neam in manus hostium hostiam offerret , & invitabat felix opportunitas , & impulsu vehementi urgebat , quod à puero in sinu suo fovit , pro Christo moriendi desiderium. Altius tamen ab alto immissum consilium , velut ex arena , ruentem jam in mortem affectum frænabat. Nè videlicet temere quid auderet , nè populum sibi concreditum , DEO adhuc fidelem , in evidenti salutis æternæ periculo constitutum , suo , si ullo tempore , subsidio egentem , gregem pastore destitueret. Vel enim populus ille conservabitur in fide , & DEO accrescet lucrum tot animarum , suisque humeris poterit in ruinam jam inclinatam DEI in *Mari-*
nis Insulis Ecclesiam sustentare ; vel si

tandem in hoc conatu succumberet, non defuturam, quam tot votis concupiverat fundendi pro DEO, & grege proprio sanguinis, occasionem. Sic urgebatur utrinque, mori pro Christo; & quid melius? si tamen animam suam fervaret adhuc, positurus tandem pro grege. Et hoc Divini erat consilii, imò exempli. Ipse enim DEI Filius mortem etiam oblatam non acceptavit ante horam, quæ erat præfixa à Patre. Sed hanc horam *Augustinus* non noverat. Et ut certam gratiam ex manu dimitteret? Coarctatus in hunc modum inter affectum & rationem, quid in corde suo dixerit, nescio: quid concluderit, quia ad historiam pertinet, referam. Abrupit hunc agonem propè sanguineum confortans Angelus, lumen de Cœlo illi missum, quo & securus reddebatur de calice passionis, quem illi jam propinaverat Pater cœlestis, & simul monebatur, ut discipulos fortassis jam in fervore primo tepidos & torpentes reviferet,

ret, neque ultimis & gravissimis Neo-
 Converforum necessitatibus deesset.
 Surgens igitur ab oratione vultum ad
 suos, proram rursus in *Rotam* Insulam
 convertit. Jam à casu describe diem
 non solis ab ortu; nec enim in Chri-
 stianis laudantur initia. Omne verò
 punctum ille tulit, qui sic principium
 fini connectit, ut qualem incepit te-
 lam, absolvat, & quem à primo ratio-
 nis diluculo affectum in DEUM susce-
 pit, in hoc concludat. Talis fuit vitæ
 series in *Ven: P. Augustino*, ut qui vitam
 omnem ad unius obsequii Divini ra-
 tiones exegerat, hanc ipsam pro ma-
 jore Divini Nominis gloria in ejus-
 dem Confessione absolveret, purpu-
 ratus proprio sanguine Fidei testis, &
 vera victima Charitatis. Sed nè mo-
 rer desideria, quæ ultimum *Ven: Patris*
 Agonem sanctâ quâdam impatien-
 tiâ extorquent, rem planissimè
 expedio.

C A P U T X X V I.

*Gloriosus & piissimus Obitus Venerab:
P. Augustini Strobach.*

UT primùm ad suos in Insulam
S. ANNÆ, sive *Rotam* rediit, si-
mul metu absolvit sollicitum pro Pa-
store gregem. Erat *Rota* Insula infame
quondam nomen, nidus eorum, qui à
principio sanctæ Fidei progressibus
toto se pectore opposuerant, recepta-
culum perduellium latronum, qui
primi manus suas sanguine primorum
Apostolorum fædaverant. Sanctâ ta-
men conversatione & usu mansuetif-
simi Patris, ita fuerunt & subacti &
deliniti, ut inter omnes *Marianos* con-
stantissimi in Fide erga DEUM & Pa-
trem suum perstiterint *Rotenses*. Did-
cerant nimirum Patris affectu se fo-
veri, quo commoda ipsorum tempo-
ralia æquè ac spiritualia, vigil & per-
nox quibus posset industriæ Charitatis
impensis, procurabat. Nam & onera,
quibus à Præsidibus distinentur ut im-
minue-

minueret, pro authoritate quâ apud Prætorem pollebat, facilè impetrabat, quæ autem eorundem commodis profutura cognoscebat, liberali ac benefica manu cum singulari propensi in eos studii significatione conferebat. Quibus officiis extorsit non solùm reciprocam benevolentiam, sed quandam necessitatem impressit, ut non possent non diligere, quem totum charitate diffluere experimentis tantis didicerant. Dum autem *Pater Ven. Agadnam* abivisset, jam in *Rotam* emissarios suos expediverant perduelles S. JOANNIS, qui & sacra & profana omnia in suam potestatem venisse mentirentur, & ut similia in suum Pastorem auderent, promissis ac minis urgebant. *Rotenses* tamē sacrilegos hos Oratores magno consensu primùm rejecerunt, deinde secreta inter se consilia habuerunt de modo & via, quâ carissimum sibi Patrem ulteriori periculo eximere, & in tuto collocare possent. Reducem igitur congratulabundi excipiunt

cipiunt, Fidem & operam in ejus tutelam spondent, quæ ipso absente attentata sint, referunt, & simul annunciant, Indum illum, qui à R. P. Vice-Provinciali sub principium tumultûs cum literis missus erat, ut Missionarios reliquos periculum edoceret, *Rotam* venisse, nec aliò progressum. Quæ res votis ipsorum vel maximè obfuit. Audiens enim *Ven: Pater, Saypenses* Præfidiarios, & Ministros Evangelii per vicinas Insulas, adhuc periculi ignaros vivere, internuncios verò Rebellium omnia in seditionem trahere, nova illa sollicitudo pro fociis denique effecit, ut tutiora postponeret, in pericula abiret, jam altiore ad hoc impulsu sic urgente. Quod consilium quidem dissuadebant amici, sed cum actum agerent, & viderent Patrem optimum obfirmato animo in mortem abire, & literas quas Nuntius retinuerat, ad socios deferre velle, non incommitatum dimiserunt. Duas igitur cymbas instruunt, quibus Patrem deve-

devehant in *Saypan*, in quo iterum
eminet, quæ erga *Ven: Patrem* singula-
ris semper fuit summi Numinis providen-
tia, curantis, ut non deessent supremi
Agonis testes fideles. Nam ex amore
comitatos fuisse, fidem fecit eventus,
cùm enim & numero & viribus im-
pares, ereptum à perduellibus *Tinia-*
nensibus Patrem, in libertatem vin-
dicare non possent, in fide tamen
erga illum perstiterunt, nam post feli-
cem ejus obitum, cùm ejecti ex *Saypan*
Insula Rebelles è S. JOANNE ad *Rotam*
confugissent, & in odium Religionis
incendiarias manus in Residentiam &
Ecclesiam, quam *Ven: Pater* eo loco à
fundamentis erexerat, pararent inji-
cere, sacrilegos compresserunt, ædém-
que sacram à flammis fervârunt.

Ad Insulam *Tinian*, ubi canoas (sic
cymbulas vocant) applicuit *Ven: Pater*,
qui omnia agebat ex consilio commu-
nicato cum DEO, præmisit ex vecto-
ribus unum, qui excurrens in litus, re-
ferret, quo statu res esset in illa Insula.
Cujus

Cujus reditum dum expectat; latrones *Tinianenses*, lembos observant (erant enim ipsi illi perduelles, qui *Josephi de Quiroga* naves pessumdederant) impetu igitur ruunt, & in cymbas insiliunt, reliquisq; innoxiiis furorem omnem in *Patrem Augustinum* expediunt, quem arreptum, concussum, raptatum ex scapha in terram, crudeliter vinciunt adstrictis post tergum manibus, non renitentem, non vultu commotum, sed manus ultro offerentem in nexus.

Quas tunc in animo DEO gratias decantavit, quòd se tanto honore dignatus sit? oculis enim respiciebat in coelum, reliqua corde premens. Sic vinctum raptant ad pagum *Soncharon*, perducuntque ad coloniae illius primum, qui conspectâ Crucifixi effigie, quæ ex collo Patris pendebat, in eum furorem abiisse dicitur, ut violentè detractò sacro hoc cymelio, illud sacrilega manu jactans, in blasphemam hæc verba proruperit: *Hic est Macanan, Magus, & impostor Christianorum*; volens-

lensque saxo confringere salutis mysterium, prohibitus fuit ab Indo Christiano occulto, qui hoc spoliū sibi relinqui petiit, animo, ut postea fassus est, servandi sacrum hoc pignus in venerationem amantissimi sibi Patris. Nihil ulterioris violentiæ à Barbaro passus est Pater, altiore uti credo consilio, ut ad similitudinem Patientis Filii DEI per plura tribunalia raptaretur.

Transmittitur igitur ad alterum vicum *Marpu* dictum, cui præerat à Religione sancta foedus Apostata, qui immemor fontis, quo salutariter ablutus fuerat, dum Pater haustum aquæ frigidae ab eo peteret, non solum protervè negavit, sed ut à se ablegaret invisum caput, cujus vel solus aspectus impio desertæ Fidei flagitium exprobrabat, ad alterum pagum levçâ integrâ dissitum deportari jubet, severè prohibens vectoribus, quamvis siti emori deberet, non stillam aut guttulam aquæ fienti indulgerent. Tandem Judici sistitur; erat is perduellium caput

Quigao

Quigao dictus, Christiani Nominis hostis infensissimus. Qui satellites interrogans, quid toto tractu itineris egisset vinctus, illis autem respondentibus, cum nemine locutum, præterquam cum solo DEO, totam illam diem exegisse in oratione, fundendo preces, quas Christiani in usu habent; Bene habet, reposuit homo efferus: Nunc videbimus ad quid conferant preces Christianorum. Ven: Pater ad blasphemam hanc vocem, cum hucusque siluisset & in secreto cordis Agonem suum DEO commendasset, rupto silentio, sic loqui exorsus est: DEUM sibi præsentem esse, & suum Protectorem, & eorum quæ sibi profutura essent moderatorem. Mortem se quidem non timere, quam pro DEO si opus foret, etiam millies animo paratissimo subiturus sit; cupere tamen se scire, quam causam necis prætendant, cum neminem ex ipsis, vel dicto, vel facto per vitam suam læsisset. Ad quam vocem cum obmutesceret Barbarus, an furore, an alia ex causa: inclamant, qui juxta stabant

sacri.

sacrilegi: & Tu quem DEUM nominas; quis ille DEUS? quas voces interrumpens parricida: non agnoscimus hunc quem dicis DEUM, & in quo te juvare possit, jam visuri sumus, simulq; in fauces Ven: Patris fustem prævalidum, quanto potest impetu vibrans, guttur frangit, & ter beatam animam, ictu unico transmittit in sinum æternæ Beatitudinis, nec enim fas est aliud credere.

Et hic fuit coronatus exitus Viri in omni sanctimonia consummati. Qui dum vixit, DEO hostia vixit perfecta, & beneplacens, Angelis & Cœlitibus gratum spectaculum, fratribus, & sociis, sub eodem sanctissimo JESU Nomine adhuc merentibus, vivum virtutum Religiosarum exemplum, illis præsertim, quos in chara sibi Provincia Boëmiæ ad imitationem provocat, ut & ipsi *sequantur vestigia ejus.*



CAPUT ULTIMUM.

*Gratiæ Singulares , quibus pretiosam
Venerabilis P. Augustini animam ex-
ornavit DEUS.*

QUæ benignitas DEI est, non finit
fervorum suorum merita ab-
scondi sub modio, sed in lucem pro-
trahit, signis etiam supra naturam,
quibus claritatem, quâ illos in Coele-
sti gloria donat, manifestat in terris ad
Majorem Gloriam suam. Neque dif-
fidimus suo nos tempore audituros
etiam miraculorum præcones, cum
Dominus Ecclesiam *Marianā* feliciori-
bus successibus condecorare voluerit.
Hoc loco solum pro coronide in com-
pendium reducam gratias illas, quæ
quidem naturæ vires superant, sunt
enim altioris ordinis, sed quoniam
ad solum spectant thesaurum virtu-
tum, non numerantur inter illa pro-
digia, quæ vulgus expectat.

Et

Et primo quidem loco cenferi me-
retur *vite tenor constans* à prima Inno-
centia usque ad ultimum halitum,
nunquam in proposito vacillans, nun-
quam à splendore suo remittens, ver-
bo, eadem facies, nunquam à seipfa
dissimilis. Quem enim habitum vir-
tutis induit puer, hunc retinuit ad-
ultus, hunc sæcularis, hunc Ecclesia-
sticus, hunc Religiosus, per tirocinium,
& Magisterium, domi ac foris, in Boë-
mia, Hispania, Mexico, inter ipsos
Barbaros, vivens ac moriens: sic ut ex
præcipuis novæ Hispaniæ Patribus in-
dubitanter de eo asserat: *Rarissimas
fuisse dotes, quibus beatam hanc animam
cumulatim adornavit DEUS, in exemplar
vivum virtutum omnium, quibus se DEO,
& hominibus præstitit amabilem. Vener:
verò P. Emmanuel de Solorzano, ejusdem
in Marianis Insulis, & superior, & in
passione focius, de vivente adhuc edi-
xit: Virum esse multæ Orationis, DEO
prorsus deditum, & qui ad excelsum fami-
liaritatis cum DEO gradum videatur ad-
L missus.*

missus. Modestia, quam congenita verecundia adhuc parvulo aspersit, nunquam defloruit, sed adolevit in illam maturitatem, ut ipsis Barbaris facrum horrorem in suâ venerationem incuteret. Manus quas à puero inter orandum ante pectus collectas, & in coelum porrectas tenuit, etiam in navi, in itineribus, inter ipsos Barbaros eodem situ retinuit. Rigor in proprium corpus crevit cum ætate. Culices inevitabile *Marianorum* Incolarum tormentum nec abigebat quidem. Paupertatem colebat studiosè, & quæ vilissima admittebat; studio munditiei reddebat durabilia; quâ curâ, vestitus quem ex Boëmia attulerat, post tanta annorum, ac itinerum intervalla usui adhuc esse potuit in Indiis. Inflammatisimos ejus in DEUM, Deiparam, ac Cœlites amores, actiones omnes, & verba, & epistolæ hodie loquuntur.

Altera gratia fuit prorsus *illibatum transivisse per hoc seculum.* Cùm enim à primo

primo usu rationis assueviffet DEO , cum illo tota animæ benedictæ erat occupatio , uti rectè contestati sunt Barbari ipsi ultimi agonis testes. Omnes ferias sextas consecraverat Indiarum Apostolo ad obtinenda incrementa sancti fervoris. Totus erat in soliloquiis , & Enchiridio S. Augustini , in Divinis nominibus P. Lessii , & flammulis Divini Amoris pervolvendis. Sensus habebat coërcitos , affectus domitos , illicia omnia curiositatis perpetuò interdictò proscripserat , cum neque in peregrinationibus per Germaniam , & Hispaniam , dum mundo Europæo valediceret , spectacula ceterùm pia sibi indulgeret , utpote cui jam pridem Mundus erat Crucifixus , & ipse Mundo. Quâ suâ custodiâ dubium non est , thesaurum intulisse integrum , & nullâ parte diminutum in Cœleste Gazophylacium.

Tertia Gratiâ fuit , cujus jam amplius potens non erat , desiderium vehementissimum *vitam pro DEO violenta*

morte commutandi. Quos igniculos cum adhuc puer suscepisset, vix explicabile est in quantum incendium excreverint per omnem reliquam ætatem, maximè dum se vidit tot gloriosis occasionibus expositum, animam suam in manibus circumferre. Atq; ita vitam egit amantium, & cum prægustu quodam beatitudinis, quam semper circumferebat in votis, insequebatur desideriiis. Unde mors pro CHRISTO fuit ipsi dulcissima. Quam quidem brevissimo Martyrio absolvit, post tam longum desiderii Martyrium, quod, licet sit suavissimum, simul tamen acerbissimum, quia tortorem habet violentissimum, nihil enim violentius amore; dulcis tyrannus, sed morte quavis acerbior, quod nemo intelliget, qui adhuc nescit amare. Cetera enim tormenta torquent nos deprædatione bonorum infimorum, Amor cælestis altiùs vulnus figit, dum nos cruciat expectatione & dilatione summi, & incommutabilis Boni.

Tan-


Tandem *finalis Gratia*, est illa, quæ sub meritum non cadit, ac proinde pura est gratia non currentis, sed misereris DEI, cujus sanè fidelis character est, vita in obsequio DEI cum ipsa profusione sanguinis consummata. In qua tamen gratia illud præfulget: quòd passio *Venerab: Patris Augustini* tantam habuerit similitudinem cum Passione Servatoris. Nam & illi præludit *Judas* sacrilegus, & in vincula raptatus fuit à cohorte Rebelligum, & per Tribunalia quatuor tractus, & in siti sua illusus, & tandem in ligno vitam finiit, & ut insuper titulus non deesset, hunc supplevit protestatio Barbari, quòd in odium supremi Numinis Præconem S. Evangelii sustulerit, fuisse in guttur velut organum prædicatæ legis Christi crudeliter impacto. Sic vixit justus iste, cujus morti, ut novissima nostra sint similia, conformemur in meritis, proficiamus exemplis.

Ætas omnis, quam in terra vixit, annum nonum supra trigesimum non excedit,

excedit, ætatem tamen CHRISTI adimplevit, qui annos æternos semper in mente habuit. De quo ex Insulis illis scribit ejus Collega: *Virum hunc, quotquot in Hispania, Mexico, Marianis Insulis novērunt, ore pleno sanctum prædicabant, quem ego (privato tamen sensu, & devotione mea) inter veros Christi Martyres habeo, ac DEUM altissimum, per ejus piissimam intercessionem rogo, ut gratiam ipsi fideliter serviendi, & mihi misericorditer largiatur. Quem privatum Viri hujus sensum, Sanctissimæ Matris Ecclesiæ, cujus solius est hoc judicium, sicut & reliqua omnia, quæ in hac historia refero, quàm reverentissimè substerno, contestans nolle me fidem iis humanâ majorem adhiberi.*

*Honoretur D E U S in
Sanctis suis.*

*Collegii Societatis IESU
Osnabrigi. a. 1704.*



N 4691
5791v

